


名

疑

卷三卷四

位



九十

名疑卷三

魯仲孫何忌春秋書仲忌公羊氏曰仲忌此何忌也譏  
二名非禮也注云難爲諱一字爲名難言而易諱所  
以長臣子之敬也

古人命字惟取一言無以兩言相兼取義者檀弓云幼  
名冠字五十以伯仲周道也初稱子旣而稱伯仲叔  
季老而尊者稱甫孔子字仲尼以孟皮爲伯也不稱  
伯而稱孟妾生長子稱孟不得稱伯也孔子弟子曾  
點字皙史記點作箴顏無繇字路任不齊字遯秦冉

字開公夏首字乘顏祖字襄申黨字周顏之僕字叔左人郢字行燕伋字思原亢字籍原憲字思廉潔字庸顏何字冉家語冉作稱狄黑字皙皆以一言爲字其他字伯牛仲弓叔魚季路季次之外惟稱子而已非有二義也

屈原字平楚詞云名余曰正則兮字余曰靈均蓋以正則釋原義靈均釋平義敷演辭章爾都穆聽雨紀談云正則靈均蓋原之小名小字也

史記漢高祖父太公母媪正韻媪烏皓切音襖張晏云

媪老母稱也皇甫謐王符等云太公名執嘉一云名媪字執嘉媪一作媪音湍一作媪媪一作媪見餘冬序錄一云媪姓也王氏小司馬索隱云母媪氏世紀云昭靈太后名含始路史注云執嘉妻含始生劉季恐皆杜撰不然太史公生世甚近何以不云爾也

漢太公四子伯仲邦交故高祖字季何孟春云高祖兄仲名喜是伯仲叔季字也但不知伯之名耳

漢帝名字取義淺顯惠帝盈字滿文帝恒字常景帝啓字開武帝徹字通昭帝弗陵字不應宣帝詢字謀又

字次卿一云次卿小字也元帝奭字盛成帝鷲字俊  
小字太孫哀帝欣字喜平帝衍字樂光武秀字茂一  
字文叔明帝莊字嚴章帝烜字著和帝肇字始安帝  
祐字福順帝保字守桓帝志字意靈帝宏字大獻帝  
協字合帝王紀云字伯和

呂后名雉荀悅云字野雞顏師古云字娥姁武帝邢夫  
人號姪娥又號姪何方言云姪好也外戚傳云姪娥  
武帝所置姬妾爵位視中二千石比關內侯

蕭何封鄼侯長子祿嗣孝惠六年薨無後高后二年封  
何夫人祿母同為侯同夫人姓或云名也夫人封侯  
始見此昔春秋齊侯以石窳與辟司徒之妻漢高祖  
以延鄉與翟母皆其食邑未有實封侯者

西漢近古班固漢書列傳無字者多其以一言為字者  
如陳勝字涉項籍字羽胡建眭弘俱字孟彭越蕭咸  
俱字仲張歐吳廣枚乘俱字叔張釋之公孫弘俱字  
季高祖同字楚元王交朱雲俱字游爰盎字絲周章字文  
鄭當時字莊是也其他如子房張良子卿蘇武子孟霍光  
政劉子孺張安世子長司馬遷子高張敞子嚴孫寶子廉何並

子明馮奉世子雲終軍谷永楊雄子貞梅福辛慶忌子公陳湯田廣明

襄丁寬子仲王同子陽王吉歐陽高子賓田延年子幼楊暉子威王商

翟方子駿劉子微息夫躬子都鮑宣趙廣漢子況尹翁歸子

元房仲卿衛青王長卿司馬相如施少卿田叔周堪

丙吉劉君卿馮野王游卿馬程卿鄭次卿鄭昌嚴翁

卿召信聖卿董賢長君路温少君翼奉實幼君周次君

戴贛君薛近君后延君戴曼君申王孫馮遂實嬰翁

孫趙充公孫顏安次公蓋寬饒少公蔡干幼公杜延年

萬仲公師長公張摯夏侯君公武翁叔金日子叔孫

賈長倩蕭望之曼倩東方朔干定次倩江長孺汲黯韓

賢杜仲孺灌夫少孺貢禹韋子孺淳于長翁梁邱賀弱

翁魏相仲翁疏廣君房賈捐之君賓龔君倩龔君況甘延壽

君孟五鹿充宗君仲史丹稚圭匡稚游傅巨先原巨君王長

賓衡成林尊長子陳遂長房石顯之類惟從一訓非有二

義東漢以後則不盡然

漢人名字有同前人字謚者如魯恭字仲康伏恭字叔

齊翟宣字太伯張禹張敏俱字伯達竇融字周公袁

安何林俱字邵公張步字文公慶普丁鴻俱字孝公

伏湛字惠公陳重字景公劉昆字桓公耿夔字定公  
 陳寵字昭公趙憲字伯陽憲一作嘉衛宏蔡倫俱字  
 敬仲戴封劉順俱字平仲翟義字文仲傅毅字武仲  
 馮遂衛颯唐檀俱字子產寒朗樂恢俱字伯奇應奉  
 字世叔何熙淳于恭俱字孟孫郭躬字仲孫賈逵种  
 暲俱字景伯鄧彪字智伯其與孔門弟子同字者如  
 陳寔字仲弓鄭崇字子游馬武許荆俱字子張王尊  
 吾邱壽王俱字子貢杜欽杜鄴彭祖孔光萬章萬音拒  
 俱字子夏第五倫字伯魚堅鐔字子伋傅燮字南容

宋義號卿子冠軍卿一作慶

黥布姓英倪寬一作兒寬冷褒一作廖褒

酷吏傳寧成一作甯成殷中一作假中滅宣一作咸宣

儒林傳殷中殷一作段一作瑕功臣表陳武一作柴

武相如傳蘭忌嚴助傳作間忌袁盎傳培生一作服

生蘭培俱姓袁盎一作爰盎

史記高祖紀周蘭一作周簡項籍紀赤泉侯楊喜漢表

作楊熹灌嬰傳肥誅漢書作肥銖郭解傳鹵公孺漢

書作魯公孺淮南王傳莊芷漢書作嚴正

漢書列傳膠東王熊渠長沙頃王鮒鮒諸王侯表熊渠作雄渠鮒鮒作附胸

前漢蒯徹漢書徹作通避武帝諱後漢朱祐吳祐東觀記作朱福續漢書作吳佑避安帝諱

史記張耳傳未言為南宮侯而楚漢春秋有南宮侯張耳按漢書異姓諸王侯表張耳歸漢立為趙王耳子

敖廢為侯敖子偃封於魯文帝時改封南宮侯楚漢春秋誤稱耳也

史記貨殖傳桓廢雍伯漢書桓作稽雍作翁

史記梁懷王勝梁平王襄漢書勝作揖襄作讓

史記汲黯傳劉棄漢書作劉棄疾

史記佞幸傳高祖時有籍孺孝惠時有閼孺而朱建傳乃云孝惠幸臣閼籍孺誤書

項伯名纏字伯高祖賜姓劉漢書功臣表射陽侯劉纏師古注云即項伯也索隱云項纏字伯陵

呂后父呂公善相人相經云呂公名文字叔平

楚漢春秋叔孫通名何字通

史記張良世家及項籍本紀俱云鯁生說我注云鯁淺

也小魚也或云鯁姓也楚漢春秋作解先生索隱云鯁生卽解生

張良父平祖開地良本韓之公族姬姓以秦捕急更姓張法言云甘羅之悟呂不韋張辟彊之覺平勃皆以十二齡羅茂孫辟彊良子也

四皓者一曰園公二曰綺里季三曰夏黃公四曰角里先生此漢惠帝時所刻四皓神座也園公陳留風俗傳作圜公或云園公名庚字宣明襄邑人也始居園中因以爲號或云姓國名秉或云姓唐或云姓庚師

古亦作圜公或云圜公姓韋而漢書法言俱作園公仙傳拾遺又作東園公綺里季綺里姓季名或云季字也或云姓吳名實字子景或云姓朱名暉字文季畢文簡公士安以綺里季夏爲一人黃公爲一人蓋以逸少淵明子美有黃綺之語耳仙傳拾遺云綺里季東園公角里先生夏黃公與張良爲雲霞之友與惠帝所刻神座同則文簡之說未是夏黃公一曰夏里黃公姓崔名廓字少通廓一作廣齊人也隱居夏里因以爲號四明志又云黃公鄞人角里先生軹人



也孔安國秘紀及漢紀仙傳俱作角蠡而魏子又作祿里或云泰伯之後姓周名術字元道又稱灞上先生角里亦其號耳元和姓纂有綺里夏里祿里三姓蓋其後裔顏師古漢書注云四皓匿迹遠害氏族無得而詳皆後世皇甫謐之徒所附會耳角音鹿上從兩點下從用漢書作用上從一撇海錄碎事云應曜隱居淮上與四皓同徵而不出曜一作耀又徐伯珍兄弟四人白首相對時人亦呼爲四皓

漢書功臣表留侯張良以韓申都下韓師古注云韓申

都卽韓王信也楚漢春秋作信都古文信申通用劉攽云韓申都卽韓申徒也張良傳云以韓司徒下韓數城史記作申徒申徒者司徒之聲轉也申都者又申徒之聲轉也國名紀云申徒申屠信都勝屠勝都本出一姓良下韓時乃韓王成非韓王信師古注誤曹參字敬伯見張華博物志

蜀郡太守文翁名黨字仲翁見李石續博物志漢書師古等注不載宋祁撰文翁祠堂碑祇云文公名翁不知李石何考

伏生名勝字子賤毛萇字子芝漢書俱不載字

漢初有審食其酈食其趙食其三人以六國時衛有司

馬食其並慕其為人故以為名

蕭何孫係周苛孫平係一作僕一作嘉平一作應

武帝紀亳人薄誘忌薄姓也一云薄字衍姓謬名忌誘

字誤

鄒陽傳莊忌夫子索隱云姓莊名忌字夫子

漢書項羽烹韓生法言作蔡生

封禪書申公武帝紀作申功

漢武帝紀東郭咸陽游水發根東郭游水復姓咸陽發

根名南越尉佗傳安國少季安國複姓少季名儒林

傳闕門慶忌公戶滿意闕門公戶複姓慶忌滿意名

戶一作扈

史記梁王世家有軒邱豹類犴反軒邱類犴複姓豹反

名反一作友漢書作犴反無類字

衛青傳輝渠侯鷹庇河基侯禽黎常樂侯銅離輝渠一

作順渠鷹庇一作雍庇又作篇訾禽黎一作鳥黎銅

離一作稠離一作調離

焦贛字延壽漢書京房傳云焦延壽字贛誤也焦一作譙楊士勛云京房本姓李

董仲舒弟子呂步舒一作呂步荼古文舒荼同音如夏后舒公子舒或作荼詩云荆舒史記年表作荆荼

酷吏傳麻戊一作麻成

儒林傳申培公轅固生高堂生胡毋生歐陽生培一作

陪轅一作袁高堂生字伯胡毋生字子都歐陽生字

伯和曰公曰生皆其稱號

儒林傳士孫張仲方從五鹿充宗受易師古注云士孫

複姓名張字仲方又丁姓子孫從榮廣受穀梁春秋師古注云姓丁名姓字子孫又聞人通漢子方從后倉受禮如淳注云姓聞人名通漢字子方

儒林傳毛萇如少路師古注云姓毛名萇如字少路風俗通毛作屯以為混屯之後又申章昌曼君李奇注云姓申章名昌字曼君風俗通申作由以為由余之後

儒林傳趙子傳蔡誼授同郡食我子公按風俗通食我韓公子也見戰國策食音嗣食我子公為博士一作

食子公無我字

顏安樂傳疏廣授琅琊筦路師古注云筦卽管字路爲御史中丞按風俗通姓氏篇有管莞二姓注云莞蘇楚大夫見呂氏春秋漢有莞路爲御史中丞又有管姓管仲見論語漢有管號爲西河太守是莞路之莞從草管仲之管從竹二字不同宋祁筆記曰草下完音丸又音官按集韻莞草名也管筦樂器也然管叔之管本上聲而周禮管人之管從竹亦讀如平聲莞音是莞筦字異而音亦有同者莞卽管字而姓苑管

音奸是莞管字同而音亦有異者

漢書劉向初名更生江充初名齊谷永初名並崔寔字子真初名台字元始仇覽一名香劉陶一名偉荀爽一名諶桓曄一名巖東觀記巖作儼服虔初名重又名祇劉珍一名寶字秋孫一作秘孫巖光一名遵華佗一名粵韓康字伯休一云名恬休一云字恬休耿國字叔慮一作叔憲范冉一作范丹童恢一作僮种荀彧漢紀作荀郁宋果字仲乙許荆字少張謝承書乙作文少作子向長字子平後世多稱向平高士傳

又作尚平王烈字彥方魏志作彥考應劭字仲遠見漢書及應氏譜而謝承書及文士傳作仲援漢官儀又作仲瑗

漢書楊由字哀侯哀當作衷

楚元王世家高祖巨嫂漢書作邱嫂應劭云邱姓也孟康云邱空也伯兄先亡空有嫂也一云邱卽巨也大也謂長嫂也○釋常談云長兄謂之元昆易云元者善之長也論語注云昆兄也非伯兄不得呼元昆余嘗謂巨嫂可對元昆

淮陰舍人告韓信反史記表云樂說漢書表云樂說而楚漢春秋以爲謝公

史記項羽本紀黥布蒲將軍服虔云英布起於蒲因稱蒲將軍韋昭云蒲姓也英布蒲將軍是二人

淮南厲王傳大夫但張晏云大夫姓但名

漢書陳平傳絳灌等讒平師古注云絳絳侯周勃灌灌嬰也而楚漢春秋以絳灌樊噲周勃灌嬰四人並稱是高祖臣別有姓絳名灌者

淮南夫蓼太子師古以夫蓼爲太子外家之姓猶言栗

太子史皇孫之類文穎以夫蓼爲太子食邑非

淮南王安養士數千高材者八人號曰八公蘇非李尙  
左吳田由雷被伍被毛被晉昌也非一作飛尙一作  
向由一作申左吳雷被伍被三人見史記漢書又高  
氏子略謂八公中有大山小山諸人竊謂大山小山  
非姓名或卽晉昌輩稱號又王逸楚辭序曰八公著  
作篇章或稱小山或稱大山其義猶詩有小雅大雅  
又漢書伍被傳有趙賢朱驕或云卽八公之數然神  
仙傳又謂雷被伍被誣告淮南王安反天子使宗正

持節治之王與八公仙去又云攜左吳王春傅生等  
五人至元洲遣還若然則雷被伍被左吳皆非八公  
之數俗傳劉安爲廁神按仙傳云安以雞犬升天天  
帝罰之使守天厠俗語本此

衛青傳平陽侯曹壽師古以爲曹參之後功臣侯表不  
載

灌夫傳穎陰侯灌嬰時穎陰侯乃灌嬰之子名何誤書  
嬰

呂侯所幸大謁者張卿或作張澤或作張釋卿字也或

澤或釋其名史記荆燕世家作張子卿

劉向傳張子僑或作子蟯又作子喬

史記項羽本紀沛公與紀信走酈山漢書作紀通張晏

云通紀信子晉灼云信被焚死不見有子司馬貞云

通紀成子按功臣表襄平侯紀通父成則通非信子

張說謬通子名相夫一名嘉

史記孝文本紀中大夫令勉師古云令姓勉名孝昭本

紀齊王廬量錯傳謁者鄧公周仁傳御史大夫張叔

歐漢書勉作免廬作間鄧公作鄧先歐作歐

漢書丙吉傳守丞誰如孟康注云姓誰名如文穎注云

誰如人名也一作譙如言姓非

漢書杜延年傳史樂成霍光傳作使樂成功臣表又作

便樂成王莽傳徐鄉侯劉快王子侯表作劉快趙充

國傳猶非猶姓非名宣帝紀作酋非

匡衡善說詩時人語曰無說詩匡鼎來三輔黃圖云鼎

衡小名也漢書衡字稚圭

史記匈奴傳郎中係雋漢書雋作序索隱云係音計

雋不疑傳有男子詐稱衛太子者本夏陽人姓成名方

遂一云姓張名延年

王吉傳谷口鄭子真三輔決錄云子真名樸或作朴  
韓王信傳有柴將軍鄧展以爲柴奇應劭以爲柴武晉  
灼又以爲柴武之子此闕名可疑者漢書注解有臣  
瓚劉孝標以爲于瓚酈道元以爲薛瓚顏師古又以  
爲傅瓚此闕姓可疑者

漢書楊王孫羸葬西京雜記云楊貴字王孫三輔黃圖  
云史稱楊王孫不稱楊貴或以字行耳

漢書壺關二老荀悅漢紀云令狐茂

古有杜康善造酒魏武短歌行注云康字仲寧

秦本紀有芊八子唐八子漢廣陵王傳有八子郭昭君  
芊唐郭俱姓八子妾媵之號芊八子秦昭王之母芊  
亡爾切唐八子秦孝文王之母郭八子漢廣陵厲王  
所幸善歌舞妾也○荆軻傳有徐夫人漢郊祀志武  
帝時有丁夫人徐丁俱姓夫人名皆男子也徐夫人  
趙人燕太子丹嘗求其匕首徐或作陳見史記徐廣  
注丁夫人越人陽都侯丁復之孫以方術詛匈奴者  
○樂府房中曲注云漢高帝時唐山夫人所作唐山



姓或云邑名漢初不聞有此人或云秦宮女史知文者高帝采其樂歌也

呂后四年封女弟類爲臨光侯類一作須樊噲婦○又宣帝母王夫人名翁須亦取易歸妹以須之義

漢書皇太后女弟司馬君力蘇林云女弟字君力爲司馬婦

漢書嚴延年女名羅敷一作羅紂又六國時有邯鄲秦氏女名羅敷嫁爲千乘王仁妻作陌上桑詞見崔豹

古今注

史記封禪書武帝王夫人漢書王作李

宣帝紀有淳于衍成帝紀有陳持弓廣川王傳有王昭平王地餘陽成昭信王成初陶望卿陶都崔脩成榮愛衡山王傳有徐來廣陵王傳有董訾胡生趙左君衛青傳有衛君孺衛子夫丙吉傳有胡組郭徵卿皆女人也淳于陽城複姓餘皆單姓衍初都愛來訾生組單名餘皆複名

荀子閭姬子奢韋昭云閭姬梁王魏瞿之美女一作明姬楚詞七諫又以閭姬爲醜惡子奢鄭之美人國風

孟子作子都

婦人以字稱者漢有少君阿少穆姜媛姜之類晉有憲英惠風絡秀道韞之類有名有字者如漢之曹世叔妻班彪女名昭一名姬字惠班陰瑜妻荀爽女名采字女荀董祀妻蔡邕女名琰字文姬晉之景懷夏侯皇后名徽字媛容武元楊皇后名豔字媛芝武悼楊皇后名芷字季蘭竇滔妻蘇氏名蕙字若蘭劉聰妻劉氏名娥字麗華右以一言爲字者如漢之袁隗妻馬融女字倫龐涓妻趙氏字娥晉之王渾妻鍾氏字

琰杜有道妻嚴氏字憲皮京妻龍氏字憐

皇后有諡起於東漢皆一字諡耳取帝諡冠其上以別之唐宋以後則否又按禮祖有功宗有德創業之君稱祖繼世有德者稱宗如夏少康商太戊武丁是已東漢以後世主槩以宗稱不復論德非古也

漢有卓文君晉明穆庾皇后亦名文君漢有王昭君北齊武明婁皇后亦名昭君舜妃名娥皇南唐後主昭惠后周氏亦名娥皇

博物志須卜居次云王昭君之女也昭君名嬙一作嫜

或云漢制嬪嬙婦人官名也須卜虜姓居次云三言  
名或云昭君女姓伊默名居次云其婿姓須卜名當  
按匈奴傳昭君爲復株鞮單于妻生二女長女  
云爲須卜居次小女爲當于居次李奇注云居次匈  
奴女號猶漢言公主文穎注云須卜當于二姓皆匈  
奴貴族是昭君長女名云而須卜當于乃兩婿之姓  
耳傳又云匈奴用事大臣右骨都侯須卜當卽昭君  
女伊默居次云之婿也漢和親侯王歙展德侯王颯  
皆昭君兄子莽遣二人使匈奴封須卜當爲後安公

又按古樂府有明君行卽昭君也避晉文帝諱樂府  
原云王昭君齊國王穰女年十七入元帝後宮積五  
六年遣嫁單于呼韓邪號昭君曰寧胡闕氏其後呼  
韓邪單于死其子雕塗莫臯立復妻昭君生二女與  
匈奴傳稍異次音旋或作次非

漢書西域傳馮夫人善史書乘錦車持節和戎而歸厄  
言云馮夫人名嬈漢宮人也嬈一作媯烏孫王尙楚  
公主解憂馮夫人侍公主爲烏孫右大將妻

薛濤林妙玉黃崇嘏並女人姓名也濤唐人號女校書

妙玉宋人號女進士崇煨王蜀時人號女狀元崇煨以詩上蜀相周庠薦攝府縣事歲久人莫知其女身也後人傳奇撰爲春桃記又餘冬序錄云國初保寧韓貞女僞爲男子服從軍征雲南可比古之木蘭

妒女廟在并州壽陽縣世傳介子推妹妒婦津在洛水世傳晉劉伯玉妻死投此水爲神山東通志云伯玉妻段氏字明光臨濟人妒婦津在臨濟

石崇婢綠珠之妹姓宋名偉一作瑋元載寵姬瑤英姓薛

浣花夫人姓任氏成都節度使崔寧之妾寧本名旰朝廷因任氏擊賊之功加旰尙書賜名寧任氏封夫人

○花藥夫人姓費氏

越以美女西施鄭旦同進於吳拾遺記云越以美女二人貢吳一名夷光一名修明或云夷光卽西施修明卽鄭旦也夷光一作移光

夫人女子僞爲男子而有官位者不但黃崇煨而已齊有揚州議曹錄事婁逞唐有昭義軍兵馬使國子祭酒石氏朔方兵馬使御史大夫孟氏

女侍中後魏元人妻胡氏。○女尚書魏明帝選知書女子爲之。○女學士唐德宗朝有貝州宋氏五女若萃若昭若華若倫若憲陳後主時宮人袁大捨等。○女博士宋孝武朝韓蘭英。○女將軍晉王廞起兵以己女爲正烈將軍唐行營節度許叔冀以衛州女子侯氏滑州女子唐氏青州女子王氏歃血赴義奏授果毅將軍。

名字有因寓居者漢書趙嘉邠人也生於御史臺字臺卿後避難更名岐字邠卿董卓別傳云卓父君雅爲

潁川輪氏尉生卓及弟旻故卓字仲潁旻字叔潁字以表名有相同者漢荀彧字文若北史拓拔彧崔彧俱字文若漢邊韶字孝先北史段韶亦字孝先漢華佗字元化北史裴佗亦字元化漢荀悅字仲豫北史庾悅亦字仲豫漢楊震字伯起宋史黃震亦字伯起北史袁昂柳昂俱字千里宋史王震朱震路震楊震俱字子發劉平張君平俱字士衡。○名字之同白姬周以來有之矣按左氏春秋傳鄭公子歸生魯公孫歸父蔡公孫歸生楚仲歸齊析歸父俱字子家楚成

嘉鄭公子嘉俱字子孔鄭公孫段印段宋楮師段俱  
 字子石鄭公子喜宋樂喜俱字子罕楚公子黑肱鄭  
 公孫黑孔子弟子狄黑俱字子皙魯公子翬鄭公孫  
 揮俱字子羽邾子克楚鬬克周王子克宋司馬之臣  
 克俱字曰儀晉籍偃荀偃鄭公子偃吳言偃俱字曰  
 游晉羊舌赤魯公西赤俱字曰華楚公子側魯孟之  
 側俱字曰反魯冉耕宋司馬耕俱字曰牛顏無繇仲  
 由俱字曰路繇與由同  
 一言字西漢尚多東漢李曇字雲三國志袁渙字曜南

史成景儻字超隋書顏之推字介顏之儀字升唐書  
 任環字瑋李元齡字喬楊元琰字溫楊仲昌字曼父子  
 崔倫字敘崔衍字著父子顏師古字籀田季安字夔柳  
 公綽字寬宋以後一言字不多見

東漢三國無複名讀史可見

三國志諸葛亮字孔明亮父珪字君貢亮子瞻字思遠  
 初亮未有子求兄瑾之第二子喬為嗣瑾啟孫權遣  
 喬往字之曰仲愼亮改喬字伯松

關羽字雲長本字長生羽子興字安興

孟達字子度本字子敬鄧艾字士載本名範字士則

曹操字孟德小名吉利小字阿瞞操二十五子有三子

以古人為字曹冲字倉舒曹宇字彭祖曹彪字朱虎

孫皓字元宗一名彭祖字皓宗

孫亮字子明呂蒙亦字子明君臣不嫌同字

韋昭字弘嗣三國志昭作曜避晉文帝諱○南史鮑照

字明遠唐宋人多作鮑昭避武曌諱曌即照字宋祁

以鮑昭為誤書非也

晉皇父謚一名靜羅尚一名仲父鄧岱一名岳胡威一

名貌許邁一名映丹虞預一名茂盧循一名元龍魏

該一名亥邾超字景興一字嘉賓褚爽字宏茂一字

期生

晉陶淵明字元亮晉禪宋後始更名潛其元亮字未更

也觀孟嘉傳及顏延之誄可見晉書稱陶潛不稱淵

明宋書稱潛字淵明俱非唐藝文志作陶泉明避廟

諱

汲縣耕人不準得古冢周書不姓準名不讀彪一作平

春秋後序作不淮字訛

南北史稱小名小字小名如蠻奴真奴黃頭烏頭客兒  
龍兒阿龍阿戎之類小字如寄奴黃奴車兒練兒道  
兒陀兒法身法生四果六真六通七符之類或云阿  
龍乃王導小字非小名也不知古人小名小字亦有  
互同者

南史宋世祖駿小字道人劉穆之小字亦曰道人北史  
封隆之小名皮裴駿小名亦曰皮

聽雨紀談云古人有小名必有小字嘗見宋進士同年  
錄皆書小名小字猶存古意然亦有不盡然者如司

馬相如小名犬子揚雄小字童烏未聞相如小字揚  
雄小名也今人亦有小名無所謂小字唐陸魯望有  
小名錄宋陳思有小字錄又有所謂侍兒小名錄豈  
小名小字可互稱邪元按陸魯望者龜蒙字也文獻  
通考有龜蒙小名錄三卷晁氏云龜蒙以末世有官  
名小名之別自秦至隋編而記之至於神仙玉女之  
名婦人臧獲之字亦無棄焉元又按唐藝文志有古  
今姓字相同錄乃邱光庭所撰又梁元帝撰同姓名  
錄一卷唐陸善經續增爲三卷是前人亦嘗留心於



名姓之異同者恨其書不傳元不及見耳

以古人爲名字者如晉書劉柳字叔惠周閔字子騫劉毅字希樂南史劉損字子騫何求字子有張伊字懷尹張霍字希光褚淵字彥回陸厥字韓卿是也古人如堯舜禹湯臯夔稷契文武旦奭孔孟顏曾諸聖賢後人取以爲名其中或加宗師效法希學欽慕繼紹如一等字自宋以來率以爲常漢晉則否

南史謝瞻字宣遠一名檐字通遠陸襄字師卿本名衰字趙卿

南史蕭寶義一名明基劉峻一名法武孫法宗一名宗之王騫一名元成王猛一名勇薛深一名道徐爰本名瑗

南史張興世本名世宋明帝益爲興世吳喜本名喜公明帝減爲喜

南史阮長之字景茂一字善業范述曾字子元一字穎彥王瞻字明遠一字叔鸞王均字元禮一字德柔王晏字休默一字士彥劉苞字孝嘗一字孟嘗王廣之字士林一字林之明僧紹字休烈一字承烈庾黔字

子貞一字貞正劉虬字靈預一字德明王茂字休連  
一字茂先徐摛字士秀一字士績顧歡字景怡一字  
元平宗測字敬微一字茂深吳苞字天蓋一字懷德  
范元琰字伯珪一字長玉

北史庾業誕一名岳長孫覽一名善古弼一名筆張蒲  
一名謨源賀一名破羌蕭贊一名綜盧誕一名恭祖  
高祐一名喜崔說一名士約崔光一名孝伯魏釗一  
名顯義叱羅邕一名協獨孤信一名如願劉亮一名  
道德王傑一名文達王勇一名胡仁耿豪一名令貴

令狐整一名延世楊雄一名惠崔簡一名覽長孫儉  
一名慶明楊椿字延壽一字仲考張湛字子然一字  
仲元張袞字洪龍一作洪寵

後周書有孝子紐因隋書作紐回

隋書楊瓚一名慧楊諒一名傑高頴一名敏李洪之一  
名文通睦秀一名旭茹謙之一名要趙默一名海

避諱更名或以字行北史孔靖字季恭唐書尉遲恭字  
敬德秦瓊字叔寶程鸞字知節溫信字輔國姜確字  
行本封倫字德彝閻讓字在德姚簡字思廉高馮字

季輔論瑀字惟貞蘇烈字定方唐璿字休璟徐洪字  
 彥伯薛禮字仁貴韋仁約字思謙徐弘敏字有功王  
 綝字方慶武甄字平一郭震字元振嚴浚字挺之劉  
 知幾字子元韋純字貫之張河字道源張六朗字介  
 然徐曠字文遠陸元朗字德明元澹字行沖嚴謨字  
 善思宋史葉賀孫字味道鄧潤甫字温伯滕甫字元  
 發趙遠字上交何頡字頡之此皆以字行者

唐人更名如懿德太子重潤本名重照惠莊太子撝本  
 名成義惠文太子範本名隆範楚王智雲本名稚詮

光王璿本名滉儀王璿本名維頴王璿本名澧永王  
 璘本名澤壽王昌本名清延王玢本名洞盛王琦本  
 名沐濟王環本名溢信王理本名沔義王玳本名灌  
 陳王珪本名泚豐王珙本名澄恒王瑱本名漙涼王  
 璿本名澁汴王璿本名滔舒王誼本名謨蜀王廞本  
 名遂刻王經本名渙均王緯本名沔與信王瑄舊名  
 同叔王縱本名洵莒王紆本名浼密王綢本名泳郇  
 王總本名湜邵王約本名澈宋王結本名滋集王緝  
 本名淮翼王絳本名滑和王綺本名浥珍王繕本名

況○張士貴本名忽崱孫處約本名道茂張仁愿本  
名仁直宋務光本名烈崔元煜本名畢李回本名躔  
李士衡本名銳李杲本名橦陸蒙先本名景路嗣恭  
本名劔客柳渾本名載韋處厚本名淳史孝章本名  
唐王紹本名純鄭澣本名涵白志貞本名琇珪李訓  
字子垂本名紳字子訓韓約本名重華張志和本名  
龜齡徐安貞本名楚璧宋之問本名少連李輔國本  
名靜忠程日華本名華陸堅本名友悌薛乂本名武  
豆盧署本名輔貞

唐人更字如段文昌字墨卿一字景初張說字道濟一  
字說之柳渾字夷曠一字惟深初名載字元興張鎰  
字季權一字公度徐温字和叔一字化光楊憑字虛  
受一字嗣仁陸羽字鴻漸一名疾字季疵

唐房元齡名字不一舊唐書本傳云房喬字元齡新唐  
書列傳云房元齡字喬而宰相世系表又云元齡字  
喬松趙明誠金石錄有褚遂良所書神道碑名字與  
新書列傳同又有于志寧撰房碑名字與世系表同  
新唐書温大雅字彥宏弟彥博字大臨大有字彥將舊

史不載彥博字餘皆同宰相世系表則云彥將字大有而彥博與傳同容齋四筆云大雅本彥宏字避高宗太子義宗之諱故以字稱如宏文館改為昭文宏農改為恒農徐宏敏改為有功韋宏機但為機李含光本姓宏改為李曲阿宏氏改為洪皆避諱故爾

唐高祖名淵高祖之祖名虎作史者避諱稱劉淵為劉元海戴淵為戴若思石虎為石季龍韓擒虎為韓擒藝文志唐壽州司法張韓撰周易啟元而撰著古法謂啟元乃唐中書舍人張轅所撰韓轅字相近而誤

舊唐書有隱士盧鴻一朱子綱目作盧鴻無一字誤脫也

五代至宋有一人更三四名者五代史張鳳更名忌又更名晟南唐書張作孫楊瀛更名渭又更名隆演李景通更名璟又更名景王宗懿更名宗坦又更名元膺劉陟更名巖又更名龔又更名龔南漢世家云龔讀音儼○宋史太宗初名匡義更名光義又更名景欽宗初名亶更名烜又更名桓孝宗初名伯琮更名瓊又更名璘又更名睿理宗初名坊更名貴和又更

名竝又更名貴誠又更名的度宗初名孟啟更名孜  
又更名禛昭成太子初名德明更名元佑又更名元  
僖太宗子商王德嚴更名元俊又更名元份

五代漢高祖劉知遠更名暉牛禮更名贊正王茂章更  
名景仁段明遠更名凝○南唐李從嘉更名煜李從  
謙更名從誦○西蜀孟仁贊更名昶○南漢劉洪度  
更名玠劉洪熙更名晟劉繼興更名鋹王繼鵬更名  
昶王近義更名曦劉崇更名旻○吳越錢宏俶更名  
俶錢信更名儼

南唐宋齊邱字超回汪台符貽書曰聞足下齊大聖以  
爲名超亞聖以爲字齊邱慙乃更字子嵩

宋人更名如仁宗名受益更名慎英宗名宗實更名曙  
神宗名傑鉞更名頊哲宗名傭更名煦○太宗子越  
王元傑初名德和英宗子吳王顥初名仲紕益王顥  
初名仲格徽宗子鄆王楷初名煥信王璩初名伯玖  
○王貽矩初名貽序石元孫初名慶孫趙贊初名彝  
向拱初名訓米信初名海進劉重進初名旻僧張昭  
初名昭遠馬令琮初名令威楊延昭初名延朗楊美

初名光元達初名守旻孔道輔初名延魯曹穎叔初  
名熙張佶初名志言王拱辰初名拱壽范恪初名全  
張璪初名琥朱諤初名緩李顯忠初名世輔馮康國  
初名輔徐經孫初名元柔歐陽守道初名與趙希館  
初名希喆危稹初名科曾從龍初名一龍鄭性之初  
名自誠姚伯用初名誠周敦頤初名敦實敦一作惇  
程顥初名延壽李若水初名若冰李彥仙初名孝忠  
巢谷初名穀王黼初名甫王居安字資道初名居敬  
字簡卿趙源之字德源初名燮字文叔宋庠字公序

初名郊字伯庠

宋人更字如丁謂字謂之一字公言范祖禹字淳甫一  
字夢得周必大字子充一字洪道徐誼字子宜一字  
宏父程公許字季興一字希穎文天祥字宋瑞一字  
履善姚希得字逢原一字叔剛尹焞字彥明一字德  
充朱熹字元晦一字仲晦真德秀字景元一字景希  
安德裕字益之一字師臯秦觀字少游一字太虛陳  
師道字履常一字無已陳奎字肇方一字偉節張抃  
字朝宗一字次山魏掞字子實一字元履洪擬字成

季一字逸叟

樊知古字仲師初名若水字叔清宋太宗召見問卿名出何書對曰唐尚書左丞倪若水亮直臣竊慕之上曰可改名知古倪若水實名若冰知古妄對人皆笑之

宋孝宗召蜀人王過問曰李融字若川何謂過對曰天地之氣融而為川結而為山李融字若川如元結字次山也

氏族言行錄云馮京父名式京生而雋邁不羣式取京所誦書題其後曰將作監丞通判荆南軍府事馮京凡十三字式既休官十一年京舉進士第一為將作監丞通判荆南如式之言時人謂式為知子氏族錄宋人所編去京未遠宜不謬而他傳馮商還妾事以為京父然考氏族錄則京父未嘗為商亦不名商也又按新宋史馮京字當世江夏人少雋邁鄉舉禮部廷試皆第一時未娶外戚張堯佐欲娶以女擁至其家束以金幣曰上意也京力辭出後為富弼壻官至太子少師謚文簡不云京父名式亦不云京嘗通判



荆南也不知氏族錄何以云然通判荆南見楚紀還  
妾事詳鶴林玉露

范仲淹父名墉為錢俶掌書記見富弼撰范文正公墓  
志而通鑑大范小范注云大范名雍仲淹之父誤矣  
雍謚忠獻非仲淹父也

易學啟蒙序稱雲臺貞逸子者即晦庵朱子也淳熙乙  
巳朱子主管華州雲臺觀次年啟蒙書成故有是號  
馮時行字當可號縉雲先生乃蜀人也見周易翼傳朱  
子乃云馮當可字時行未審孰是

趙師舜字從善舜與擇同

名與字同者如晉書安帝名德宗字德宗南史蔡興宗  
字興宗王僧孺字僧孺師覺授字覺授慕容紹宗字  
紹宗魏蘭根字蘭根崔彥穆字彥穆唐書尚可孤字  
可孤張嘉貞字嘉貞白元光字元光郭子儀字子儀  
李嗣業字嗣業魏少游字少游張孝忠字孝忠戴休  
顏字休顏高崇文字崇文張巡字巡楊燕奇字燕奇  
孟浩然字浩然李修字修田承嗣字承嗣田緒字緒  
子宋史戚同文字同文

姓名並變者如史記范睢入秦稱張祿范蠡入齊稱陶  
 朱漢書劉文伯卽盧芳運期曜卽梁鴻三國志馬忠  
 卽狐篤晉書李辰卽張昌劉尼卽邱沈唐書楊守亮  
 卽訾亮李國昌卽朱邪赤心李寶臣卽張忠志李忠  
 臣卽董秦李抱玉卽安重璋李全略卽王日簡成汭  
 卽郭禹楊守立卽胡弘立又改姓名李順節五代史  
 殷崇義卽湯悅朱友卽康勤李紹虔卽晏球李茂貞  
 卽宋文通李繼鵬卽閻珪王宗阮卽文武堅王宗滌  
 卽華洪朱友恭卽李彥威李繼定卽桑弘志王德明

卽張文禮李繼麟卽朱友謙李繼琛卽康巡孝李紹  
 安卽袁象先李紹冲卽溫韜李紹宏卽段凝孔循卽  
 趙殷衡李紹英卽房知溫宋人陶穀卽唐彥謙趙保  
 忠卽李繼捧趙保吉卽李繼遷李良嗣卽馬植李繼  
 昭卽孫德昭李繼弼卽董彥弼鄒訢註參同契卽朱  
 熹朱說卽范仲淹蜀才卽范長生

蜀才註易顏之推云范長生蜀人自

稱蜀才

古人姓名或有異文。姓之異者如殷賢遲任遲或作  
 遲或作遲或作越鄭人融明強鉏罕虎融或作陵或

作艘或作嬰強或作彊或作弔罕或作罕齊人丙歎  
 雍廩丙或作邠雍或作離或作邕齊威王時盼子盼  
 或作盼晉人卻缺特官籍談蛾析知伯卻或作郤特  
 或作殖籍或作藉蛾或作蟻或作螳知或作智楚人  
 椒舉為章保申闔伯比若倫椒或作栳或作某為或  
 作遠保或作葆闔或作鬪或作鬪若或作遠秦人扁  
 鵠扁或作鵠鄭人洩駕陳人洩冶洩或作泄或作涑  
 東周臣伶悝伶或作冷漢功臣表訾順雕延年摎廣  
 德祕彭祖籍瓌訾或作曆或作曆雕或作鵬摎或作

擲祕或作祕籍或作席舍人無且無或作鄒或作邢  
 司徒掾俞達俞或作郇或作俞丞相冥都冥或作鄆  
 太子少傅瓶守瓶或作餅諫議大夫救仁救或作掾  
 尚書令鞠譚鞠或作鞠東海太守鄙熙鄙或作畜或  
 作備九江太守邾脩邾或作弗大中大夫來歛來或  
 作萊或作邾御史大夫鼂錯鼂或作晁御史汎勝之  
 汎或作汎陳球碑黎陽黎或作犁博士楛生楛或作  
 榔或作培京兆尹雋不疑雋或作雋或作嵩魯相郁  
 貢郁或作鄭或作或王莽時南山盜侖宗侖或作鄒

備備侈多六字通用中常侍鸞輝鸞或作鸞晉人咎  
堅咎或作咎姚秦將軍歛憲歛或作斂。名之異者  
如周武王時虞闕父闕或作遏春秋楚史狎或作籛  
大夫菽或作菽申包胥包或作鮑魯大夫盭或作濼  
子服湫或作淑鄭伯緹或作緹或作強莒大夫挈或  
或作茹晉大夫輔躒或作櫟齊高士顏歆或作蠲或  
作鄆或作觸漢功臣侯芭或作巴北平康侯顛或作  
躒輝渠侯僕朋或作多

諸葛亮岳飛並諡忠武世人祇稱諸葛武侯岳武穆按  
三國志亮卒贈武鄉侯諡忠武宋史飛卒孝宗詔諡  
武穆嘉定四年封鄂王理宗改諡忠武矣是二公皆  
當以忠武稱又田汝成西湖志云飛以紹興十三年  
諡武穆淳祐六年改諡忠武景定二年封鄂王改諡  
忠文與宋史稍異

關羽長子平同羽死于臨沮岳飛子雲同飛死于獄飛  
五子雲雷霖震霆雲其養子也季女抱銀瓶投井死  
世稱銀瓶娘子

杭州千勝將軍廟世傳祀張巡長子亞夫或云去疾也

亞夫授金吾大將軍而去疾乃亞夫庶弟亦以巡功  
補官

漢晉複姓後代少見。複姓複名者如漢有公上不害  
紅陽長仲間邱仲卿胡母子都吾邱壽王西門君惠  
單父左車昭沙掉尾曹牟君卿瑕邱申陽陽成昭信  
乘馬延年函冶子覺五鹿充宗義渠安國尙方巧屠  
駁馬少伯落姑仲興北宮伯玉北唐子真句龍吾斯  
三國時有白侯子安晉有胡母輔之由吾道榮大張  
芻督安邱望之宿勤明達黑匿郁鞠隋有章伏大翼

鉗耳君徹鉗一作籍。複姓單名者如漢有公玉帶  
公師壹公仇稱公沙穆公堵恭堵一作緒公賓就公  
夏浩公乘興公綦稠弓里游工師喜終到恭宗伯鳳  
鍾吾蒼龍邱萇師宜官綦母參於邱團母邱儉母將  
隆都尉朝申章昌新垣平孫陽放邯鄲善鮮陽馘高  
陵顯瓜田儀蛇邱惑奈邱病長興渠王史音梁垣烈  
梁武恢棠谿惠莊邱勝商邱成庚季梁成公綏成公  
恢成陽恢涇陽犇周陽由周生豐侯史吳金吾扈士  
孫瑞史樂成水邱岑武安恭主父偃浩星賜左行恢

馬適育蔣匠熙擾龍宗叔先雄東里袞古成雲干已  
行先賢揮黃公庇青陽精右師譚右行綽壽西長仲  
長統曼邱臣正令宮祝其承璞陽逸室中同揭陽定  
索盧放伯侯儁百里嵩辟閭彬卽墨成息夫躬三國  
時有胥門巢陶邱洪太史慈濮陽興三邱務晉有公  
師式茨芑仲空相機綦母達西方虔車成將古成詵  
信都芳冠軍夷五鳩盧素和明相里覽密貴周悉羅  
騰公休勝虞邱進西郭陽仇泥歸泥一作尼此類不  
能盡舉

漢書貨殖傳有姓偉注云姓姓偉名

班固本姓班揚雄本姓楊字訛而姓亦因之

應劭風俗通所載郡守縣令姓名甚異如合浦太守虎  
旗上郡太守邸杜河內太守遇沖北平太守賤瓊東  
平太守到質沐寵北平太守卑躬鴈門太守宿詳五  
原太守督瓊汝南太守謁渙九江太守荆脩東海太  
守鄙熙宏農太守移良南郡太守爲昆酒泉太守頻  
暢北海太守處興巴郡太守鹿旗涿郡太守作顯廬  
江太守貴遷交趾太守賴先外黃令集一洛陽令諸

於單父令卽賣烏傷令昔登山陽令職洪高唐令用  
蚪此二十餘人考之漢書惟有移良一人耳餘無所  
見故洪邁隨筆疑劭爲妄著愚謂劭在東漢末以文  
士稱守令姓名何限豈得憑虛杜撰哉觀此則古之  
名賢不登史冊者多矣

李鼎祚周易集解所引姓名晉人有宋衷宋音森其字  
從木從穴姓氏諸書不見此姓與采字不同

千家姓有難識字試舉一二如鄒聖蜀毒嵐並音攜隄  
衮適並音堤軒芋嘒並音呼爲遠闖寫並音委學舉

並音拱糝糶並音昨鵠音弁雀音久盍音求帖音姑  
傷音身聚音聚音言藺音慢藺音並音間斜音斗  
元音其脊音慎休音溺馱音委陪音徘莧音胥迮迮  
竿並音仄榻音喧警音干致音好妞音紐豆音注姪  
音豆肱音聿汧音晃曩音緩覓音縮颯音尋俱音耐  
偕音着音音閃韻書又作貢又作質與音暴受音到  
鹵音赤蚕音畝囟音必屨音合床音本馴皮養切并  
都感切聃所嫁切韻書又作聃耳古字通用○天順  
甲申進士彥茂湖廣公安人英宗不識其姓問內

閣李賢賢對音與陝同因命改姓陝事載菽園雜  
記今湖廣通志及楚紀荆志諸書並不言陝茂改姓  
之故

千家姓有字雖異而音義同者如飢與饑脩與修淡與

澹呼與嘑疏與疎欣與忻衮與院慎與脊鼃與晁陰

與露暴與隻偃與偃邠與邠邠與邠譙與焦闕與矚

毒與聖遠與蔞為洩與泄汎與汎伏與宓笮與笮並音仄

管與筦管與蔞學與舉千家姓注二字音拱並山陽族按韻書有舉無學或舉字

之訛也舉音扶觀姓苑有舉姓而千家姓缺舉字可見蕪與鄒蕪與巷千家姓注蕪音

孤巷音浮篇海注蕪卽巷也蛾與蠓並音蟻尊與罇旁與傍之類是

也有音義同而字省邑旁者如邨成部告鄒等鄭憂

邵召邨后邨曾鄞童鄞盈鄞豐邨辰邨台邨來邨專

邨圭邨夾邨云邨兒邨于邨希鄞貿鄞畜邨弗邨禹

鄞業邨丙鄞庸鄭莫之類是也有字同音異而重出

者繁樊婆二音單丹善二音譚談等二音相襄象二音番藩婆二音句勾句二音被

皮比逢二音縫麗二音尉胃鬱二音九姓是也有字同音同義同亦

重出者兒鞠二姓是也豈以兒有千乘河南二族鞠

有河南汝南二族故耶或云兒有而倪二音鞠有菊麴二音



鄭有石塼魏有石塼塼音團又音駝塼一作專音補又  
音敷塼塼音義不同漢箕節侯璘俞閭侯璘一從目  
一從日音同義不同漢秣陵終侯纏容城侯徐纏歸  
德侯先賢揮纏纏揮三字音義同古通用

漢宛胸侯執五據侯曜立易侯僕黜猗氏侯陳邀成敬  
侯董潔曜立一作曜邱黜一作黜執一作藝邀一作  
連潔一作縹

漢魯文王駿音鐫有利侯釘音鼎徐卿侯焮音桂武安  
侯授音受松茲頃侯捷音妾與捷同幾侯張路音各

安衆侯欵音禁高郭節侯曠音鬻

漢襄城侯桀龍注云桀龍卽龍桀也殊謬滇陽侯樂說  
滇本汝南地或作慎或作滇俱非

漢有鍾離昧晉有邯鄲醉姚興有太史令郭麇唐有竇  
維濞昧或作昧醉或作醉麇或作麇濞或作濞並誤  
王充論衡云字經三寫烏焉成馬信矣

東晉本姓疎以避難改棗據本姓棘以避仇改

文彥博譜云先世本姓敬曾大父避晉高祖諱更姓文  
至漢復姓敬大父避宋翼祖諱又更姓文初敬氏避

諱各用一偏或姓文或姓苟又按邵氏聞見後錄云  
敬從著音棘非苟也從支非文也俗書之訛如此

梁四公子名甚異後裔各以爲姓一曰仇齊一曰翫本  
一曰蜀闖一曰麤黠仇諸兩切音掌一作瓜翫無販  
切音萬或作翫非也翫奴鈎切免子也音獠與翫字  
音義不同蜀戶圭切音攜或作毒又作嵐又作墨義  
同闖敕蔭切音趁麤市玉切音蜀或作麤又作越黠  
他端切音獠或作徕又作湍又按王子年拾遺記異  
人梁四公曰蜀闖曰翫杰曰越黠曰仇督夫翫杰卽

翫本仇督卽仇齊也杰音遏不音傑也督或作膺音  
親齊督膺字訛然姓譜謂孟軻母仇氏出梁四公子  
仇齊之後蓋七國之梁而拾遺記以四公子爲梁武  
帝時人事甚詭異又托爲沈約撰。三國時吳王孫  
休四子名字慣與世同乃損益六書作之吳錄載休  
詔曰禮名子欲令難犯易避古或一字今人競作好  
名好字又令相配所行不副此贅字伯明者也孤嘗  
陋之孤今爲四男作名字太子名鼂字菡次子名寔  
字聿次子名詭字盥次子名翫字焚鼂音彎菡音迄

冀音銳與音賢詎音莛音舉寇音褒焚音擁取其  
易避云云按韻書詎一作詎一作詎又音祿寇一作  
寇注並云休子名是也裴松之注三國志譏休不典  
之音垂嗤後代誠然

謝莊以風月景山水名五子颺肫顛從瀟○宋子虛以  
五行名其友五子蠡森森森

人生有文在手因以爲名所謂以名生爲信者也說者  
惟引唐叔虞魯公子友以實之不知周之先世鞠陶  
商之有南赤龍皆以手文爲名鞠陶事見史記有南

赤龍事隱史書未載按辨證云湯八世孫盤庚妃夢  
赤龍入懷孕十有二月生子有文在手曰南遂封之  
南國號有南赤龍楚地記云漢江之北爲南陽漢江  
之南爲南郡並以古南國得名耳又世說周昭王夫  
人生子左手有文曰公右手有文曰羽乃賜姓翁氏  
又左傳宋武公生仲子仲子生而有文在手曰爲魯  
夫人故仲子歸于魯生桓公

六帖云周之時有騏期漢之時有杜度謂姓名同音也  
卮言又云周之時有衆仲魯大夫余謂周之時有承成

衛大夫戰國之時有摎留韓大夫摎音劉漢之時有虞禹張章

夫三國之時有奚熙北燕錄有光祿大夫乙逸明朝永樂時有大理卿周舟

事有同姓相類者如沈瘦事前有約後有昭略望塵之潘前有黨後有岳書紅葉之鄭前有虔後有谷致冰鱗之王前有祥後有延寄怨詩妻之竇前有元後有滔弔客驢鳴之王前有粲後有濟

吞珠治吏韓詩外傳以為伍員國事以為張丑弓影致疾風俗通以為杜宣晉書以為樂廣之客抱甕出灌

莊子以為漢陰丈人說苑以為五丈夫化不孝子仇覽傳以為蒲亭長於陳元謝承書以為陽遂亭長於羊元桃梗語士偶戰國策以為蘇秦於李兌史記以為蘇代於孟嘗君殺鄧析者左傳以為駟歆荀子劉向並以為子產不入勝母之里尸子以為孔子淮南子鹽鐵論並以為曾子齒剛舌柔說苑以為常縱告老子孔叢子以為老萊子告子思烹彘教子韓非以為曾子韓嬰以為孟母射石沒羽新序以為熊渠呂覽論衡並以為養由基漢書西京雜記並以為李廣

獻不死之藥戰國策以為荆王類說以為燕王漢武  
 內傳以為武帝獻空籠而無鵠國事以為蔡無澤世  
 說以為淳于髡依王生之言以對君得拜水衡都尉  
 漢書以為宣帝於渤海太守史記楮先生以為武帝  
 於北海太守三年不蜚不鳴之語史記楚世家以為  
 伍舉說莊王而滑稽傳又以為淳于髡說齊威王  
 客為雞鳴渡秦關有孟嘗君而又有燕太子丹雪中高  
 臥有袁安而又有胡定感虎渡水有宏農太守劉昆  
 而又有九江太守宋均投筆封侯有班超而又有傅

介子與疾入殿有司徒傅祗而又有太傅王導伏棺

止火有汝南蔡君仲而又有長沙古初決爭牛之訟

有顧憲之宋書而又有于仲文後魏書看竹有王猷而又

有袁粲啖炙有顧榮而又有何遜折梅遣使有陸凱

而又有諸發躬導母輿有潘岳而又有崔邠妻勸隱

居有陸通而又有老萊子圍棋却賊有費禕而又有

謝安居官留犢有魏之時苗而又有晉之羊篇帛書

傳鴈有漢之蘇武而又有元之郝伯常見元史並前

席顧問有商鞅秦孝公時賈誼漢文帝時而又有蘇綽周文帝時

酒救火有樂巴樊英而又有郭憲佛圖澄倒用印者

有段秀實而又有李崧作非非國語者有江端禮見王

應麟而又有虞燦見元史食飯知勞薪所炊者晉平

公時有師曠見隋書而晉武帝時又有荀勗見勗非本傳

百有才者魯肅稱龐統而諸葛亮又稱蔣琬居官給

雞卵于部民收雛俾利者有吳興守謝朏宋書孝而武時

又有益州新昌令夏侯彪出朝野僉載母嚙指而心痛者

有曾參而又有蔡順撲鏡於地者有夏侯惇而又有

張祐獻胙加毒以讒賜死者有晉獻公子申生而又

有秦孝文王子西蜀侯暉沈江負父屍有孝女曹娥

而又有趙祉女絡佩六印有蘇秦而又有樂大御屏

隔坐有漢之鄭宏第五倫而又有吳之紀亮紀隲食

脫粟飯有晏嬰而又有公孫宏作錢神論有魯褒而

又有胡毋民成公綏羊車遊後官鹽水洒地有晉武

帝而又有宋文帝錦纜牽舟有甘寧而又有隋煬帝

獲偷侍兒人試文不殺因以賜之有楊素於李伯藥

而又有蔡興宗於孫敬玉強索人妾有孫秀阮佃夫

而又有武承嗣告靈不仕有王羲之而又有何偃奕

棋覆局有王粲而又有到溉製千字文有周興嗣而  
 又有蕭子範贈柳妾有韓翊而又有李還古誤食燥  
 豆有王敦而又有陸暢殺負心僕有張詠而又有柳  
 開金蓮歸第有王珪而又有蘇軾知牛鳴者有介葛  
 廬左傳而又有詹何韓非子知馬鳴者有翁偉論衡而又有  
 李南抱朴子知雀鳴者有楊宣益部耆舊傳而又有成子桂陽  
 先賢畫讚知鵲鳴者有管輅魏志而又有張子信齊書孫守榮  
宋史長頸鳥喙者有夏禹而又有越勾踐目視日不眩  
 者晉有王戎隋有劉炫而宋又有蔡京目重瞳者有

虞舜項羽而又有隋之魚俱羅南唐李煜猿臂者有  
 后羿而又有李廣郭知運號水鏡者有司馬德操而  
 又有樂廣柳莊號智囊者有樗里子晁錯而又有魯  
 匡桓範杜預號鳳毛者有謝鳳之子超宗而又有王  
 導之子劭號聖童者有張堪而又有任延號孝童者  
 有王方翼而又有段秀實號奇童者有潘岳楊愔李  
 百藥而又有柳宗元楊炯李泌號千里駒者有劉德  
 曹休傅咸劉曜符朗顧和張敷蕭暎王規劉杳王茂  
 任昉而又有邱仲孚袁昂李彥伯袁曜馮翊王潤崔

昂元文遙杜杲張乾威李嵩

號萬石者五石奮嚴延年馮號七貴者二漢西京七族

趙丁傳也時稱外戚七貴又隋有牛弘蘇威字號三

文述張瑾裴蘊虞世基裴矩時稱選曹七貴號三

少者四晉阮裕稱王羲之王應王悅為王氏三少唐

齊李師盧公順崔君洽亦號三少又號三君者二順

石孟石憑石悠兄弟號橋林三少號三君者二順

張安世金日磾皆七世珥貂後漢應順應疊應柳應奉

應劭應瑒應亨晉王導王洽王珣王曇首王僧虔王

揖王筠並七世通顯

漢劉岱劉繇許靖許虔皆號二龍而唐之烏承玘烏承

恩南唐徐鉉徐鍇亦號二龍李氏兄弟亮叔訓秀號

四龍而房氏兄弟豫垣遂熙亦號四龍汝南先賢傳

周氏五子子輿子羽子仲子明子良號五龍而公沙

穆五子紹孚恪達樊張裕五子演鏡永辯岱辛氏五

子攀鑿曠寶迅以及燕山竇氏五子皆號五龍又異

姓號五龍者汜昭戴祁徐晏夏隱劉彬而索靖汜衷

張魁索紉索永亦號五龍卞粹兄弟六人並登宰輔



世號六龍而温恭兄弟六人並知名亦號六龍陸微兄弟七人號七龍而崔徵兄弟七人亦號七龍荀淑子八人號八龍比之高陽八才子而崔瑄兄弟八人亦比荀氏八龍又賀德仁兄弟劉知幾兄弟伏羲兄弟各八人皆號八龍後魏崔樞兄弟九人皆長瑜子也號九龍而北齊王昕同母兄弟九人皆醞藉亦號九龍

賈彪兄弟三人號三虎而陸曇兄弟三人並有才名亦號三虎北齊崔陵弟仲文號二鳳而隋之魏景義魏

景禮亦號二鳳

五世盛德者二王昶子湛湛子承承子述述子坦之又杜畿子恕恕子預預子錫錫子义四世掌誥者二胡宿胡宗愈胡交脩胡世將張嘉貞張延賞張弘靖張次宗三世掌誥者五李德林李百藥李安期徐齊聃徐堅徐嶠孫逖孫宿孫簡張說張均張濛李昉李諤李昭述三世典選者二謝莊謝瀹謝覽劉林甫劉祥道劉齊賢三世同官者八周訪子撫撫子楚並為益州牧梁顥子適適子美並為京兆尹王儉子暕暕子

承並為國子師趙才子道興道興子皎並為執金吾  
孔穎達孔志孔惠元並為司業呂蒙正呂夷簡呂公  
著並為司空韋仁約韋濟韋弘景並為左丞薛琮薛  
榮薛兼並傳東宮

父子宰相者四周勃子亞夫韋賢子元成平當子晏蘇  
瓌子頰父子三人入相者二韋仁約子承慶嗣立鄭  
珣瑜子覃朗父子狀元者二安德裕子守亮張去華  
子師德梁顥子固兄弟狀元者二孫何孫僅宋郊宋  
祁兄弟列戟者二張儉張文張巡李峴李峘李嶧崔

琳崔珪崔瑤門皆列戟時號三戟

稱李杜者四漢李固杜喬李雲杜衆李膺杜密唐李白  
杜甫稱蘇李者二漢蘇武李陵唐蘇味道李嶠蘇頲  
李乂

漢馮野王字君卿弟立字聖卿相代為上郡太守民歌  
大馮君小馮君時稱二馮而唐之馮宿馮定亦稱二  
馮漢蘇章蘇不韋稱二蘇而南齊蘇湛蘇綽宋蘇軾  
蘇轍皆稱二蘇劉氏兄弟齊名世稱二劉隋有劉焯  
劉炫唐有劉懿之劉禕之又劉夙劉朔宋有劉敞劉

放又劉靖之劉清之又劉燭劉炳稱二吳者吳坦之  
吳隱之載於世說而吳通微吳通元兄弟並爲學士  
又吳育吳充並有才名皆稱二吳楚人龔勝龔舍並  
著名節史記作兩龔傳而龔夬龔大壯亦稱兩龔見  
玉海小學紺珠晉王戎王衍清談時人語曰二王當  
國羊公無德而羲之獻之書法亦稱二王又梁時王  
銓王錫亦稱二王謂之玉昆金友孫謙孫廉號東莞  
二孫而孫何孫僅亦稱二孫陸機陸雲稱二陸而陳  
時陸瑜陸琰後魏陸暉陸恭之俱稱二陸

稱三王者唐王珣王珣王璿宋王安石安國安禮又王  
同王向王罔稱三范者范純仁純禮純粹而范鎮子  
百祿百祿子祖禹亦稱三范祖禹詩玉堂三世見題  
名是也稱三張者張嘉貞延賞弘靖三世宰相時號  
三相張家而張廷珪張齡張休前後牧洪州號洪州  
三張又晉之張載字孟陽張協字景陽張元字季陽  
時人語曰二陸入洛三張減價稱三薛者河東薛收  
薛德音薛元敬而薛琮薛榮薛兼亦號三薛

宋有五寶端明學士儀禮部侍郎儼起居郎侃參知政

事傳補闕僖此五人皆諫議大夫禹鈞之子唐亦有

五竇國子祭酒常司業牟容管經略羣婺州刺史庠

武昌節度使鞏此五人皆左拾遺叔向之子

吳人自稱曰儂陳後主喜稱儂隋煬帝亦自稱儂曹操

稱瞞唐明皇亦自稱阿瞞

唐書懿宗時諸道進白者白者二字他書未見蓋唐時

闍人之稱即今所謂淨身人也

古人有離合文字隱郡國姓名者如孔北海四言一篇

云漁父屈節水潛匿方離魚字與時進止出寺施張離目

字魚日呂公饑釣闔口渭旁離口字九域有聖無土不

王離或字口好是正直女固子臧離子字海外有截隼

逝鷹揚離乙字子六翮不奮羽儀未彰離鬲字龍蛇之

蟄比它可忘離虫字鬲玟璇隱耀美玉韜光玟去玉成文字

無名無譽放言深藏離與字按轡安行誰謂路長離手字與

手合此乃魯國孔融文舉六字也出寺施張一作出

行施張饑釣一作釣磯女固子臧一作女回子匡海

外一作海內不奮一作將奮比它一作俾也又參同

契後序云鄒國鄙夫幽谷朽生委時去害依託邱山

循遊廖廓與鬼爲鄰百世一下遨遊人間湯遭厄際  
水旱隔併此乃會稽魏伯陽五字也又越絕書卷末  
云記陳厥說畧其有人以去爲姓得衣乃成厥名有  
米覆之以庚此乃袁康二字也又云文屬辭定自於  
邦賢以口爲姓丞之以天楚相屈原與之同名此乃  
吳平二字也卽如漢時董卓將亡童謠云千里草何  
青青十日卜不得生千里草董字十日卜卓字也晉  
時王恭將叛童謠云黃頭小人欲作亂賴得金刀作  
蕃捍黃頭小人恭字也秦苻堅爲姚萇所殺童謠云

魚羊田斗當滅秦魚羊鮮字田斗單字姚萇鮮單種  
也

周宣帝自稱天元皇帝禁人有天高上大之稱改高姓  
爲姜九族高祖爲長祖宋政和中禁人以龍天君王  
帝上聖皇玉主等爲名字故毛友龍但名友句龍如  
淵稱句如淵葉天將但名將樂天作但名作方天仕  
改名大仕方天若改名元若衛上達賜名仲達葛君  
仲改名師仲周綱字君舉改字元舉俞聖求改名應  
求程瑀字伯玉改字伯禹宣和中詔罷前禁云○洪

武三年禁革小民毋以天國君臣聖神堯舜禹湯文武周漢晉唐宋等國號爲名字。○正統十年進士登科錄凡天字皆作芟云出內閣意景泰中幸太學謝表內閣自爲之中有管窺霄蠡測海句蓋亦避天字也時有識者詫其事正德初逆瑾擅政禁民不得用天等字爲名如郎中方天雨但名雨參議倪天民但名民未幾瑾誅識者謂無天之罪已兆於此

### 名疑卷三

### 名疑卷四

古今姓名同者甚多如唐堯虞舜二帝也漢書有唐堯爲臨武長梁書有虞舜爲太常丞夏后啟商湯二王也呂氏春秋有夏后啓乃鄒公之子與白公同時元魏書有商湯乃商疑式之孫箕子比干二忠臣也前漢王侯表中山孝王之子名箕子元魏列傳有吉陽男名比干曾參顏回二賢人也魯有曾參殺人晉書有顏回爲堯帥况其他乎故羅泌云古今姓名同者劉弘王褒俱十有一張良有九張敞王吉俱十有八

不可不辨

古帝有庸成氏黃帝臣亦有庸成。少昊白帝曰朱宣氏唐亦有濮州刺史朱宣

伏羲臣有巫咸商大戊時亦有巫咸

伏羲妹女媧禹娶塗山氏亦名女媧

神農時有赤松子黃初平亦號赤松子

黃帝臣有風后夏禹時亦有風后。黃帝臣有張若秦始皇時亦有蜀郡太守張若。黃帝臣有離婁殷時亦有離婁三國時亦有離婁見管輅傳。黃帝臣有

扁鵲善醫戰國時亦有秦越人號扁鵲善醫。黃帝

臣有伍胥楚平王時亦有伍胥。黃帝史官孔甲夏

后亦有孔甲孔子八世孫鮒亦曰孔甲

后稷之生也始棄之因名曰棄功在萬世宋芮司徒之生女也始棄之亦名曰棄幾危宋國

帝嚳臣名羿有窮之君亦名羿俱以射稱少昊子名班魯人亦名班俱以巧稱

帝嚳孫彭祖元季亦有廬州妖人彭祖

黃帝元妃西陵氏第三子名龍苗夏少康第三子亦名

龍苗

顓頊號高陽夏后局亦號高陽

商有牧正趙隱元魏有祕書監趙隱唐有宰相趙隱

桀臣有左師觸龍秦紀亦有左師觸龍

湯臣有女鳩周宣王之妾亦有女鳩

周公之子伯禽唐李太白之子亦名伯禽

春秋有逸民朱張後漢亦有朱張字孫卿

春秋鄭有兀者申屠嘉漢書文帝時有丞相申屠嘉

春秋晉有荀偃漢書武帝時有左將軍荀偃

春秋齊有王豹前漢功臣表亦有王豹晉書又有王豹

戰國趙有王良後漢書亦有王良

春秋隨有季梁而七國魏亦有季梁

衛有太子蒯瞶刺客傳亦有趙人蒯瞶

兩司馬喜一戰國中山相一漢司馬遷之大父

三召平一齊相一秦東陵侯一漢初廣陵人

春秋魯有秋胡前漢亦有杜陵人秋胡

楚屈原姊名蘋漢呂后妹亦名蘋魯有魯班而三國吳

王長女亦名魯班



戰國有兩毛遂西京雜記云野人毛遂墜井而死客以告平原君平原君曰嗟乎天喪予矣既而知非平原君客

齊有孟嘗君田文魏相亦有田文後漢亦有合浦太守

孟嘗

孔子弟子有公孫龍平原君客亦有公孫龍

齊人公孫宏與孟嘗君同時見戰國策及呂氏春秋漢武帝時公孫宏封平津侯又明帝時有幽州從事公孫宏交通楚王英見虞延傳

齊襄王時有太史嫩又有勇士太史嫩一作噉

齊公呂望號太公田和亦號太公

列仙傳有成周時仙人浮邱伯漢書楚元王傳有孫卿弟子齊人浮邱伯以詩授魯穆生

秦昭王時有五校大夫王陵漢高帝功臣亦有安國侯王陵

趙將有扈輒而漢初張耳將亦有扈輒

六國時有樓緩而前漢淮南王臣亦有樓緩

史記秦末有田疇三國志魏亦有田疇

漢初有兩韓信一封淮陰侯一封韓王未幾即為降虜  
前漢兩貢禹一為高帝謁者一字少翁元帝時御史大夫  
夫

前漢兩呂嘉一呂台子封常山王見呂后傳一封臨蔡  
見南越傳

前漢兩韓安國一武帝時御史大夫拜護軍將軍自有  
傳一元帝時定襄太守拜建威將軍見馮奉世傳

兩王商皆成帝時人一為相一為大司馬

漢武帝時朱買臣為會稽太守梁元帝時亦有朱買臣

為武昌太守

漢武帝時有江都相董仲舒南齊巴東王子響為荊州  
刺史亦有直閣將軍董仲舒譙秀蜀紀載蜀之八仙  
亦有董仲舒

監

前漢宣帝時丙吉為丞相後漢安帝時丙吉為太子廚  
前漢兩張禹一字長子為御史大夫與蕭望之同時一  
字子文元帝時詔傳太子成帝時為丞相封安昌侯  
後漢張禹字伯達和帝時為太傅安帝時以定策功

封安鄉侯

前漢兩王莽一天水人字稚圭昭帝時爲右將軍與霍光同心輔政一卽新莽篡漢者

王莽四輔有劉秀爲國師封嘉新公與光武同姓名光武未起兵時與姊夫鄧晨俱過蔡少公家少公學圖讖言劉秀當爲天子或曰是國師劉秀乎光武戲曰何以知非僕邪坐者皆大笑○又漢有侍中奉車都尉校定山海經陳振孫云此劉秀卽歆也歆初名秀後漢兩王郎一邯鄲人詐稱成帝子興爲光武所誅一

東海人字仲子

後漢兩鄭衆一興子字仲師一宦者字季產

路史發揮云漢兩龔遂俱爲郡太守兩京房俱明災異漢有荊州太守巨武秦苻堅將亦有巨武

漢孔安國孔子十一世孫治古文尙書武帝時諫議大夫晉孔安國字安國愉之子爲尙書左僕射

晉右軍王羲之苻堅之將亦有王羲之

晉侍中張華慕容垂之將亦有張華

晉李密字令伯一名虔唐李密字元邃一字漢臣元史

又有北海盜李密

晉王肅字子雍元魏王肅字子恭

晉張載字孟揚一作孟陽宋張載字子厚

晉葛洪字稚川宋葛洪字容父

晉兩劉毅一字仲雍武帝時為尚書左僕射一字希樂

與劉裕起義兵討桓元為豫州刺史

晉兩周撫一為彭城內史以反誅一為王處仲將有傳

晉兩孫秀一為吳降將見賈充傳一為趙王倫嬖人見

陶侃傳

晉兩解系一自有傳一見陶璜傳

晉兩周訪列傳云時有與訪同姓名者罪當死吏誤收

訪訪奮擊之吏皆走

庖言云南朝有兩劉琨文人有兩王褒兩蘇子卿

唐兩韓翃皆文宗時人一知制誥一為太守帝書翃寒

食詩春城無處不飛花一絕句云與此韓翃

唐兩李光進一光弼之弟一光顏之兄皆為名將秉節

鉞

唐兩李珣列仙傳云李珣出相節制淮南時江陽部民

亦有李珣列名洞府

唐兩李益列傳云憲宗時益為集賢殿學士時又有太子庶子李益同在朝故世稱文章李益以辨云

唐王珪字叔玠為宰相諡曰懿宋有兩王珪一字禹玉左僕射諡文公一為光祖之父涇原勇將號王鐵鎗

唐徐勣字懋功宋徐勣字元功

唐張齊賢陝州人諫議大夫宋張齊賢曹州人左僕射

○唐有嶺南節度使蔡京宋有丞相蔡京

唐郭震字元振魏州人宋郭震字希聲蜀人

唐香山九老會有兩盧正一侍御史一河南尹

五代梁有王彥章吳亦有王彥章

宋兩張觀一字思正絳縣人吏部侍郎兼御史中丞卒贈吏部尚書諡文孝一字仲賓毗陵人度支判官廣

南西路轉運使並仁宗時人

宋兩張忠俱開封人一英州團練使一永興副都督並仁宗時人

宋兩孫益一揚州泰興人紹定中李全犯揚州縣令王燦募益拒賊戰死一不知何許人宣和末知寧朔府

救太原戰死二人並見忠義傳

宋兩王延德一開封人溫之子授平州防禦使一大名人授左千牛衛上將軍

宋兩黃震一字伯起一字東發

宋兩王著一字成象單父人翰林學士一字知微渭南人殿中侍御史

宋兩王繼勳各有傳一陝州平陸人授磁州團練使一外戚彰德節度饒之子孝明皇后同母弟也

元兩張榮一靖州人一濟南人

金有郝天挺字晉卿元亦有郝天挺字繼先

仙傳兩尹公度一名喜一名軌或云尹喜一字公文

仙傳有王喬而曹魏時亦有王喬見魏明帝賜曹幹壘書

程叔子號伊川而邵康節之父名古字夫叟亦號伊川

見陳繹所撰邵處士墓志黃淵撰愚邱記云經世觀

物吾不如伊川丈人謂邵古也淵初名仲元字善甫

號四如居士宋亡乃更名淵亦字天叟號韻鄉聳翁

晚年又號彥安

余嘗讀歷代史傳見陳姓輒記之。○有四陳忠一寵子  
字伯始漢尚書令一諶子漢青州刺史一穎川人唐  
宰相夷行之祖一宋末寧晉人學徒私諡茂行先生  
元左丞祐之祖。○三陳崇一漢平帝時南鄉侯一伯  
宣子唐江州刺史一隱子宋崖山令。○三陳孚一字  
剛中臨海人國史院編脩一湘陵人上舍及第一瓊  
山人舉進士。○三陳元一河陽侯涓之五世孫漢即  
邱公士一厭難將軍欽之子字長孫仕莽爲郎一字  
伯元元至正中進士道州錄事參軍。○三陳咸一萬

年子字子康漢尚書令莽召爲掌寇大夫不應一升  
卿子字逢儒宋司農少卿諡勤節一越兄宋寶謨閣  
待制。○三陳泰一羣子字立伯漢潁陰侯諡穆一義  
門兢弟一字同志茶陵人宋進士及第。○三陳欽一  
尚書令咸之子不仕莽一廣信人字子佚莽從受左  
氏春秋仕莽爲厭難將軍一思讓子後周長州長史  
。○三陳敏一字令通晉惠帝時右將軍一皓子宋武  
功縣男宣州觀察使一無錫人宋台州守。○三陳光  
一寔子一子昂子唐商州刺史一汲縣人宋壽陽尉

○兩陳千秋一安子漢豪侯一紀信侯倉之裔漢長  
安公士○兩陳夷行一字道周唐左僕射一公輔子  
宋進士○兩陳嬰一軫子秦東陽令漢堂邑侯一錯  
子漢豪侯諡懷○兩陳安一審子一應子漢豪侯諡  
節○兩陳願一恒子一伯周子唐萬州刺史○兩陳  
清一願子一密子○兩陳察一願子一元基子唐文  
州刺史○兩陳夔一寔子一天祐子○兩陳洽一寔  
子一後主叔寶子○兩陳恂一泰子漢潁陰侯一布  
亮子宋大理丞○兩陳準一佐子字道基一篆子與

朱文公友善○兩陳康一漢魏郡太守一達子晉丞  
相掾○兩陳高一鼎子齊散騎常侍一保子宋莆田  
人學徒私諡靖逸先生○兩陳遵漢書陳遵字孟公  
豪俠所在人懷之惟恐後時列侯有同孟公姓名者  
孟公每至門人曰陳孟公座中莫不振動既至而非  
孟公因號其人爲陳驚座○兩陳蕃一字仲舉漢太  
傅封高陽侯一伯仁子隋資陽令○兩陳襄一霸先  
族弟封鍾陵侯一京從子唐鹽官令○兩陳翔一珍  
子字子麟漢御史中丞一省華祖五代時蜀新井令



○兩陳璿一鄴子唐渠州刺史一宋宜城令。○兩陳瓚一鄴子唐黔州刺史一文龍從子宋季起兵死難。○兩陳悝一買子漢曲逆侯一騫兄咸寧初太尉。○兩陳奇一棘蒲侯武之子一元魏河北人字修奇。○兩陳卓一居仁子字立道宋樞密院僉書諡清敏一咸寧人有至行。○兩陳武一漢高祖功臣棘蒲人一廬江人字子烈吳偏將軍。○兩陳英一康子晉肝貽太守一若拙子宋奉禮郎。○兩陳鳳一戶牖侯平之裔漢平帝時爵關內侯一平帝時中郎將與王暉等

出使有功封盧鄉侯。○兩陳儁一費侯賀之曾孫漢茂陵上造一仕莽稱白虎公。○兩陳粲一祗子漢關內侯一本子漢東鄉侯。○兩陳靖一光武時散騎常侍封餘干侯一仁璧子字道卿宋太僕卿。○兩陳嘉一復陽侯胥之子嗣爵諡共一棘蒲侯武之曾孫漢雲陽上造。○兩陳碩一桐廬人吳封富陽侯一襄安人峴之兄。○兩陳琳一廣陵人字孔璋魏軍謀祭酒一宜城人曄從兄。○兩陳峴一碩子陳譙州刺史一禮部侍郎桷之孫宋中書舍人。○兩陳起一蘄春人

南唐監察御史一沅江人宋永州倅。兩陳琰一字玉伯宋殿中侍御史一字中叔宋閤門使。兩陳繹一叔明孫唐侍御史一字和叔宋集賢院學士。兩陳規一字元則安邱人宋德安守一字正叔稷山人金右司諫。兩陳充一字若虛宋殿中丞一文毅公亮之弟。兩陳邁一字亨伯宋資政殿學士一翰林待制孚之子元浙江行省左右司員外郎。兩陳祇一汝南人字奉宗漢侍中諡忠一叔寶子字承敬封信義王入隋爲通議郎。兩陳兢一叔寶子字承檢

封邵陽王入隋爲國子監丞一義門鴻之弟

史傳有祖孫兄弟同名字者紀一二於左

少昊名摯其孫顓頊之子亦名摯是爲帝摯

湯名天乙紂父亦名天乙。湯長子名太丁武乙之子

亦名太丁

周仲雍曰虞仲仲之裔周章孫亦曰虞仲

蔡文侯名申其元孫昭侯亦名申

魯莊公之孫仲嬰齊仲字嬰齊名也而文公之孫亦曰公孫嬰齊仲嬰齊者從祖也又同時。魯孟孫氏之

後有公孫宿季孫武子亦名宿

宋兩公子朝皆曰宋朝一為司寇乃桓公弟一出奔仕

衛論語宋朝之美是也

衛穆公名遯其裔孫成侯亦名遯

鄭公孫段字子石而印段亦字子石乃公孫段從兄之

子也○鄭公子嘉字子孔公子志士亦字子孔

晉范宣子士句其同族伯瑕文伯亦曰士句

楚公子申字子西乃平王子昭王兄也又有右司馬公

子申而鬬宜申又字子西○楚有公子啓而公子元

之子亦名啓○楚屈氏有兩屈蕩

前漢書五侯表氏邱侯名偃楊邱侯亦名偃皆齊悼惠

王之孫皆文帝十六年封○平的侯名利親劇魁侯

亦名利親皆菑川懿王之後○金鄉侯名不害就鄉

侯亦名不害皆東平思王之孫皆以元始元年二月

丙辰封○楚夷王名如意廣宗王亦名如意封斯侯

又名如意○菑川王名終古趙敬肅王之子柏暢侯

亦名終古齊孝王之孫博陽侯又名終古○汶夷侯

名廼始東陽侯平隄侯俱名廼始○濟陰王名不識

蒲領侯亦名不識。山原侯名外人乘邱侯亦名外人。懷昌侯名延年安陽侯歆安侯祝茲侯安定侯復陽侯中鄉侯樂都侯俱名延年其他名喜七名賢十名聖四名義五名仁七名元七名嘉十一福祿壽慶等名同者又不可勝計。

後漢書列傳沛孝王名廣濟南悼王亦名廣梁節王名暢中山穆王亦名暢陳敬王名羨汝陽侯亦名羨梁夷王名成下邳貞王亦名成樂成哀王名崇陳頃王任城節王俱名崇中山簡王名焉魯恭王之後亦有

劉焉字君郎

晉書王氏族有兩王渾一昶子一戎子。兩王愷一字茂仁一字君夫。兩王緩一緒父一衍父。兩王澄一濟弟一衍弟。兩王安期一含子一湛子。兩王處沖一名還一名湛。

元魏安同父名屈同之子亦名屈

唐宗室世系表義成王名琮奉天亦名琮。鬱林王名恪建王亦名恪。蔡王房之系名平者二人永安王孝基之後名瓌者二人

唐兩陳徽一叔英子字元凱申州刺史一叔明孫溫州司戶參軍叔英叔明皆陳宣帝之子也

宋太祖次子德昭字日新又魏王廷美次子德隆亦字日新從兄弟同字又同時

父子有同名者漢書王侯表廣陵孝王之子名德封廣平侯德長子嗣爵復名德豈傳錄訛邪○襄陽隋處士羅君墓志云君諱靖字禮襄陽廣昌人高祖長卿齊饒州刺史曾祖弘智梁殿中將軍祖養父靖學優不仕有名當代碑字明楷父子同名靖不可曉見容

齋隨筆

晉張老字孟其子名趨亦字孟齊管夷吾字仲諡敬其父名山亦字仲諡莊是皆父子同字蓋孟仲之字乃當時相呼兄弟行次非如後世因名取字也

管夷吾稱管仲但夷吾名重當時掩其父稱耳

晉大夫卻克字駒伯卻克子卻錡亦字駒伯

父子有名字相類似兄弟之稱者前漢韓長君子曾字季君孟喜字長卿其父號孟卿○後漢劉般字伯興其子愷字伯豫蔡邕字伯喈其父棧字伯直黃琬祖

父名瓊應璩應瑒之父名珣。○三國志袁渙父名滂  
 孫綝父名綽劉楨父名梁。○晉書王緒父名綏王濟  
 父名渾。○唐書杜鴻漸父名鵬舉呂溫父名渭臺渥  
 父名濛。○五代王繼恭父名繼鵬朱洄父名滔  
 晉書胡毋輔之子謙之王羲之子徽之徽之子楨之  
 宋史米黻字元章子友仁字元暉  
 宋史王溥子貽正貽正子克明尙太宗公主更名貽永  
 音令與父同行此宋制也  
 元史陳也先子兆先明先。○劉思敬子思恭

神仙幽怪姓名最不同

彭祖陸終之子名篋字鏗封於彭謂之大彭仙傳云彭

祖姓篋謬虞翻篋作翦古字通用

老聃姓李名耳字聃一作聃一作聃呂覽老聃貴柔是

也一作儋左傳太史儋是也古文聃聃聃聃儋通用列

子楊朱篇聃於色注云聃與耽同史記云老子名耳

字伯陽以其耳漫無輪號曰聃集真錄云老子始生

母名之曰元祿字伯陽國語伯陽甫是也列仙傳云

老子諡聃呂氏春秋云舜染於許由伯陽注云伯陽

老子也恐誤蓋舜時伯陽別是一人按王安石撰許氏世譜云伯陽神農之後佐堯舜有功賜姓姜則非老子明矣。老子本臯陶之裔世爲理官以理爲姓紂時有理徵是也徵字德靈古文理李通用故左傳行李國語作行理初無二義或云古文使字作岑左傳蓋言行岑之往來訛爲李字國語又訛爲理音也路史謂理徵事紂抱道不合而死其妻契和氏逃難伊侯之墟命其子利貞改姓李氏利貞老子十二世祖也利貞子仲師左傳類解晉里克注云商末理徵

孫仲師避難改姓里氏是李理里三姓同祖矣姓譜北史新舊唐書等有謂老子生於李下而得姓有謂因亂食苦李而得姓有謂因饑食木子而得姓有謂老子母李氏女因母得姓有謂老子生於李氏家冒姓李均妄尹喜傳稱聃爲古先生

老聃父名乾字元杲一作元果舊唐書又云聃父名敬前涼錄索綏云元杲年七十二無妻與鄰人益壽氏野合孕十年而生老子故世傳老子母爲益壽氏路史云元杲娶洪氏名嬰敷孕十有二年坼左腹而生

老子南唐書世裔譜云元杲為周上御史大夫娶益壽氏女嬰敷生老子或云元杲娶滕氏元妙內篇云老子母無壻妄

老聃子名宗字尊祖宗一作崇為魏將軍封段又封干因以為姓魏世家有段干子蓋即宗也列子有段干生田齊世家有段干朋戰國策有段干綸段干越人孟子有段干木風俗通注云姓段名干木呂覽亦云干木光於德魏都賦亦云干木之德而唐書百官表又云封段為干木大夫俱誤

老聃師常縱一作常縱一作恒縱一作常縱或云即商容也商容一作容成容成公見於周穆王時自稱嘗為黃帝師列仙傳容成讚云豐豐容成伯陽仰疇或云容成商容蓋二人商容即殷紂賢臣知禮容者老聃學禮於商容

老聃傭人徐甲二百餘年約每日賃百錢聃少甲七百二十萬錢尹喜還之出神仙傳殊妄甲一作申

注老子者有河上丈人戰國時人有河上公漢文帝時人有偃松子有任真子皆莫知其姓名而宋人所著異號錄賓



實錄俱不載

王子晉周靈王之子年十八而登仙路史云名超古字子晉或云名晉或云諡晉或云字子喬或云字開山後漢列傳云王喬爲葉令卽古仙人王子喬也一云王子喬卽史記封禪傳王伯僑

涓子名蜀梁一作濁梁甘子名需一作孺

鬼谷子者蘇秦張儀詭稱其師以駭俗也或云姓王名詡一名利一名詡戰國時隱居潁川陽城之鬼谷因以爲號史記張儀傳亦云儀與蘇秦俱事鬼谷先生

學術隋志有鬼谷子十三章蓋其所著書也或云後人譌撰或云鬼谷子一號元微子又琴纂云蔡邕入清溪訪鬼谷先生蓋別是一人

秦方士徐市漢書作徐福按字書市卽古黻字漢時福黻字通用仙傳拾遺福字君房

東方朔父姓張名夷字少平或云名平母田氏朔以東方爲姓其說不一見洞冥記列仙傳時鏡新書又王充論衡云朔姓金氏改姓東方嚴君平姓莊名遵一作尊

呂巖字洞賓初名紹先更名巖

洞賓師鍾離權字寂道號雲房一云字執柄一云字雲

房

洞賓弟子盧生名英。何仙姑姓趙名何一作和

韓湘字清夫一字伯渚或作北渚訛清父名老成祖名

介文公愈之親兄湘本愈姪孫而集仙傳云愈之猶

子非

南岳鄧先生名郁字彥達

麻衣子姓李名和。天門子姓王名經。通微子姓楊

名什伍。神和子姓屈突名無爲。元真子姓張名

志和。達觀子姓李名荃一作荃。抱朴子姓葛名

洪字稚川。金華子姓劉名崇遠。清虛居士姓王

名鞏字定國。無盡居士張商英也

焦光字孝然光一作先

殷七七名文祥一云名道筌。王子芝字仙苗子一作

紫

世傳月中斫桂吳剛字質故李賀云吳質剛一作罡。

史記封禪傳有宋毋忌樂彥引老子道經云月中仙

人宋母忌也白澤圖又以宋母忌爲火仙

淮南子云羿請不死之藥於西王母羿妻姮娥竊以奔月羿爲帝譽臣非夏時羿也姮娥羿妻名一作嫦娥或云嫦娥字純狐則又以爲夏羿妻矣黃庭經云高奔日月吾上道鬱儀結璘善相保注引上清紫微文云鬱儀奔日之仙結璘奔月之仙此語亦見雞跖集結璘韻府作結儀竊疑姮娥結儀之說俱妄或因尙儀占月而訛耳

楚辭注云豐隆或曰雲師或曰雷師屏翳或曰雲師或曰雨師或曰風師按歸藏云豐隆巫雲氣而告之則雲師也穆天子傳云天子升崑崙封豐隆之葬郭璞注云豐隆筮師御雲得大壯卦遂爲雷師淮南子云季春三月豐隆乃出以將其雨張衡思元賦云豐隆軒其震霆雲師黶以交集則豐隆雷也雲師屏翳也天問曰萍號起雨則屏翳雨師也洛神賦云屏翳收風則風師也淮南子云雨師灑道風伯掃塵說者以爲箕畢二星列仙傳云赤松子神農時爲雨師風俗通云元冥爲雨師其說不同據楚辭則以豐隆爲雷

師飛廉為風伯屏翳為雨師  
 西王母者九靈太妙龜山金母也一號太虛九光龜臺  
 金母元君或云姓焉氏。雲林夫人王母第十三女  
 名媚蘭。紫微夫人王母第二十女名玉清娥。一云  
 名青娥字愈意。雲華夫人王母第二十二女名瑤  
 一云名瑤姬。太真夫人王母之小女名琬字羅敷  
 王母有三鳥使者一曰大鷲一曰小鷲一曰青鳥  
 如此類者誠哉荒唐之言

上元夫人者三天真君之母紀總仙籍亞於王母其侍

女名阿環

樊夫人名雲翹劉綱之妻。東陵聖母姓杜師事劉綱

衛夫人名鑠字茂漪

南岳魏夫人晉司徒舒之女劉幼彥之妻名華存字賢

安號紫虛元君又稱黃庭君

諶母許真君師也名嬰一作櫻許真君名遜字敬之

九華真妃太元上真元君李夫人之少女姓安名鬱嬪

字靈蕭

太元女姓顓頊名和。毛女名玉姜

燕昭王時有元天二女善舞一名旋波一名捉琰出王  
子年拾遺捉琰杜陽編作搖光

女仙又有成公智瓊許飛瓊李真多楊敬真曾妙典錢  
妙真王妙想杜蘭香段安香黃觀福黎瓊仙董上仙  
王子登謝自然楊正見張連翹戚逍遙安法興張玉  
蘭邊洞元崔少元裴元靜戚元符薛元同盧眉娘曹  
文姬萼綠華婉陵華盱母梁母麻姑郝姑龐女褒女  
明星玉女雲臺玉女殷女昌容秦女弄玉之類成公  
復姓萼綠華姓楊或云卽九疑山羅郁

甘氏星經云太白上公妻號女媧居南斗媧音前甘氏  
者卽甘公善說星者也天官書云齊甘公藝文志云  
楚甘公齊楚不同未知孰是劉歆七略云甘公一名  
德。石氏亦有星經石氏者魏之石申父也後漢書  
作石中夫

梁玉清織女星侍兒也秦始皇時太白星竊玉清逃入  
衙城小仙洞十六日不出天帝怒謫玉清于北斗下  
玉清有子名子休配河北行雨每至小仙洞耻母淫  
奔之所輒回故其地少雨見李元獨異志甚誕

世傳伏羲妃死爲洛神如淳注漢書以爲伏羲女

世傳湘妃神乃堯之二女舜之二妃從南巡而溺死湘

江故屈原九歌有湘君湘夫人鄭元張華輩斷以爲

舜妃羅泌又以爲舜之二女曰霄明曰燭光第三妃

登比氏所生也靈照百里處於湘江爲神迄今有分

風送客之異宵一作肖山海經比作北

登封有啓母石應劭郭璞輩皆云啓母塗山氏所化歷

代崇祀見漢武帝紀淮南子云禹通轅轅塗山欲餉

聞鼓乃來禹跳石誤中鼓塗山忽至見禹爲熊慙而

去至嵩山下化爲石禹曰歸我子石破北方而生啓

此與廣德所祀聖河夫人事相類呂氏春秋又謂啓

母乃九尾白狐益妄盧元明輩又以啓母爲陽翟夫

人按嵩高記陽翟夫人妊三十月子從背出五歲入

山學道爲母立祠曰開母祠開卽啓也遂訛爲塗山

云嵩北又有少室姨神廟唐楊炯撰少姨廟記云少

姨廟其神爲婦人像故老相傳啓母塗山之妹莫詳

所始

蘇伯吉利祝融之裔也吉利妻王氏名搏頰死爲竈神

見五經異義搏頰一作搏俠

仙傳拾遺司命君生於唐時民間與元環同學年十五

六仙去環一作壞事甚誕。西陽雜俎竈神名壤子

又云名隗狀如美女姓張字子郭夫人字卿忌有六

女皆名蔡

宋玉高唐神女賦寓言託興以諷襄王非必實事如唐

人記后土事以譏武后之類耳集仙錄乃謂巫山神

女名雲華即王母之女以太上靈寶之文授禹者甚

妄而文士又為神女傳記以實之徧舉天地百神可

笑也

河伯姓馮名夷見文選李善注太公金匱云河伯姓馮

名修然莊子淮南子裴氏新語皆以為馮夷一名冰

夷又龍魚河圖云河伯姓呂名公子夫人姓馮名夷

唐時秦宗撰河侯祠碑云河伯姓馮名夷字公子皆

荒誕無稽

賜谷之神名天吳是為水伯

北海之神名禺彊一作隅彊一作禺京是為元冥

夸娥氏古之有神力者一作夸娥

禹治淮水功不成禹怒召百靈命夔龍等請命因囚鴻蒙氏彰商氏晁氏盧氏黎婁氏乃獲淮水神名無支祈者彰商一作章商晁一作兜一作邱一作斲黎婁一作犁婁無支祈一作亡支祈善應對形若猿狖青軀白首金目雪牙頸伸百尺力逾九象騰越倏忽視不可久禹命童律烏木田不能制乃命庚辰制之鎖械淮陰龜山之麓庚辰后稷字

風俗通云共工之子脩好遠遊死爲祖神亦見禮記外傳及荀彧傳注惟路史以祖神爲術囂之子名條者且辨脩字爲非蓋臆決也

仙傳云三茅君茅濛元孫也長君名盈字叔申次君名固字季偉小君名衷字思和盈爲東岳上卿司命真君固爲定錄真君衷爲保命真君固一作容衷一作震茅濛字初成師鬼谷先生三輔黃圖又引茅盈內傳云盈乃濛曾孫

山海經云炎帝少女名女娃溺死於海化爲鳥名精衛女娃一作女媧又云帝女死於姑媯山化爲菴草又云夸父之杖化爲鄧林夸父一作舉父又云帝殺欽



鴉化爲大鴟又云女媧之腸化爲十神均妄

山海經多神怪不備載載其字異者槐江山神名英招  
一作英昭崑崙山神名陸吾一作肩吾郭璞注云卽  
莊子所謂肩吾得之以處大山也驪山神名耆童一  
作老童羸母山神名長乘一作長來一作長采驕山  
神名蠹圍一作鼃圍岐山神名涉蠶一作攝鼃東海  
渚中神名禺繇一作禺號一作禺號南方苗民有神  
名延一作延維一作委蛇東荒神人名犁醜一作黎  
靈

世傳鍾馗唐武德中應舉不捷觸殿階而死後見夢於  
明皇曰臣終南進士鍾馗願除天下虛耗之孽此事  
見逸史唐書不載或云北史堯暄字辟邪本名鍾葵  
馗葵音同見續博物志又按周禮考工記云大圭首  
終葵注云終葵椎也正韻云葵一作揆楊子卮言卽  
以鍾馗之訛本於此似無確據若以字音相同則左  
傳殷人七族有終葵氏爾雅釋草篇有終葵中馗二  
草名豈可曲引爲證或云鍾馗當作終葵謂六書本  
義終有窮極畢死之義古文夔一作馗集韻馗夔達

壘通用夔山鬼名孔叢子所謂土石之怪夔罔兩是也窮治邪鬼故稱終夔耳此亦意撰也若然則作鍾馗亦可鍾有收聚之義何必改鍾爲終俗繪鍾馗執鬼以衛宅韻府云鍾馗鬼名非也又按孫述張說文集有謝賜鍾馗畫表則鍾馗之名不始於開元時矣山海經神荼鬱壘二神人主執惡鬼神荼一作神荼鬱壘風俗通作鬱律或又作鬱騅王充云鬱壘嶷嶷之類陸法言集韻壘音律沈休文云鬱壘者屈律也丹鉛續錄云神荼者伸舒也鬱律者苑結也

外國夜又一作野又羅刹一作落魁

釋氏通鑑唐高宗乾封中道宣律師在淨業寺一天神至自稱姓王名璠爲南方天王復有一天姓羅又一天姓費又有天人姓陸名元暢其說甚妄

佛圖澄天竺人姓帛或作白。支遁字道林姓閔。一行姓張本名遂乃剡國公公謹之孫元素之姪也

釋氏有造天地經云寶歷菩薩下生世間號曰伏羲吉祥菩薩下生世間號曰女媧摩訶迦葉號曰老子儒童菩薩號曰孔丘又有清淨法行經云真丹國乃能

從化遣迦葉往爲老子淨光童子往爲孔丘又遣月明儒童往爲顏回三弟子者出生其國乃能從化其侮聖無忌如此故唐杜嗣光有吉祥御宇儒童衍教之說而韓愈亦謂佛者云孔子吾師之弟子也意指此耳道藏經又謂莊王癸巳之歲一陰之月老君遣尹真人喜乘月精白象下天竺於淨梵夫人口中託生佛蓋老釋互相陵壓可發一笑

老聃鬴左脇而生釋迦鬴右脇而生與詩人所詠后稷之生不坼不羸者異矣

仙傳有僕僕先生紀聞錄有異僧號和和二人皆唐人佛本夷教北史名字多取佛語如楊津字羅漢晏昭字菩薩宇文導亦字菩薩宇文護字薩保婁叡字佛仁魏收字佛助蕭思道字釋奴趙善字僧慶魏元字僧智尉遲綱字婆羅王軌小名沙門薛端小名沙陀王晞小名沙彌其他稱僧仲僧紹僧奴佛奴佛保之類不可勝舉。宋歐陽修小兒名僧哥有一僧戲修曰公不信佛何有此名修曰人家小兒要易育成故以賤名爲小名如羊豕狗馬之類是也聞者服其捷對

釋氏稱比丘比丘尼皆冒吾先聖名字

元人最尚佛老之教其大臣以和尚爲名者二人一乃蠻氏一伯牙吾台氏以道童爲名者一人封營國公諡忠烈

釋氏通鑑劉宋時異僧有求那跋陀羅求那跋摩求那姓跋陀羅跋摩俱名。唐太宗貞觀時有法師道遜一作道遜。元宗時藥王願施藥餌藥王姓韋名古字老師古或作吉踈勒國人也。睿宗先天時永嘉眞覺大師名玄覺一作元覺

唐德宗時龐居士謁石頭和尚忘言妙悟居士名蘊字道元一作述元有男名耕穫女名靈照

中華一言夷音益至二三言故其姓名字多

晉書張天錫字純嘏初字公純嘏入朝人笑其三言字因自更焉余謂華人以三言爲字者自天錫始五胡亂華斯其兆也北史胡人字多三言元人名字至七八言極矣

三言名字北史齊高祖高歡字賀六渾周閔帝宇文覺字陀羅尼明帝宇文毓字統萬突武帝宇文邕字彌

羅突崔宏度字摩訶衍賀拔岳字阿斗泥万俟洛字  
 受洛干斛律金字阿六敦宇文震字彌俄突宇文直  
 字豆羅突宇文憲字毗賀突宇文昭字豆盧突宇文  
 儉字侯幼突宇文純字堙智突宇文盛字立久突字  
 文達字度斤突宇文通字屈率突宇文道字爾固突  
 尉遲迴字薄居羅韓果字阿六拔達奚實字什伏代  
 北燕馮跋小名乞直代。隋書文帝楊堅小名阿羅  
 延。唐書安祿山本姓康字軋犖山。五代史石敬  
 瑭父名臬捩雞

夷人呼字與名義不相涉亦有字相同者如遼史耶律  
 覲烈字兀里軫蕭痕篤字兀里軫。耶律八哥字烏  
 古鄰耶律何魯掃古字烏古鄰耶律諧理字烏古鄰  
 蕭陶隗字烏古鄰。耶律學古字乙辛隱耶律室魯  
 字乙辛隱耶律魯帶字乙辛隱耶律幹特刺字乙辛  
 隱蕭陶幹字乙辛隱蕭胡覲字乙辛隱。耶律盆奴  
 字胡獨堇耶律獨顛字胡獨堇耶律撻不也字胡獨  
 堇耶律弘古字胡篤堇蕭秀穆字胡獨堇蕭迂魯字  
 胡突堇獨篤突音訛又耶律乙辛字胡覲衮亦音訛

○耶律抹只字留隱耶律海里字留隱耶律烏不呂  
字留隱蕭蒲奴字留隱。耶律撻烈字涅魯亥蕭敵  
烈字涅魯亥。耶律馬六字揚隱耶律敵祿字陽隱  
蕭繼先字楊隱揚陽揚音同。耶律曷魯字洪隱耶  
律化哥字弘隱洪弘音同。耶律羽之字寅底哂蕭  
海璨字寅的哂底的音訛。耶律阿思字撒班蕭鐸  
盧幹字撒板阿里只字撒本班板本音訛。耶律察  
割字歐辛耶律朗字歐新辛新音同。耶律侯哂字  
禿寧蕭滴列一作敵烈字圖寧耶律頽昱字團寧禿

圖團音訛。耶律敵刺字合魯隱蕭合卓字合魯隱  
耶律圖魯窘字阿魯隱合阿音訛

金太祖姓完顏氏名阿骨打一作阿古打完顏者華言  
姓王也熙宗名合刺一作曷囉馬完顏烏野一作烏  
也烏野者華言第九也完顏懶路一名石土門或作  
神徒門又作神土懣完顏習室一作習失習室者華  
言常川也完顏習古乃一作實古乃完顏蒲魯虎一  
作蒲盧虎完顏蒲甲一作蒲家完顏幹啜一作兀朮  
一作幹出一作晃幹出兀朮者華言頭也完顏習宜

烈一作習尼列完顏按答海一作阿魯縮按答海者  
華言客也完顏粘罕一作粘沒喝粘罕者華言心也  
完顏幹論一作幹倫幹論者華言生鐵也完顏迪古  
乃一作阿思魁迪古乃者華言來也完顏阿鄰完顏  
阿懶一作兀鄰兀懶阿鄰者華言山阿懶者華言坡  
陀也完顏銀朮可一作銀出可銀朮可者華言珠也  
紇石烈牙吾塔一作牙吾答紇石烈者華言姓高也  
僕散阿海一名安真僕散者華言姓林也孛朮魯阿  
海一名定方孛朮魯者華言姓魯也烏古論胡刺一

作胡魯刺烏古論者華言姓商也石抹老幹一名溫  
仲石抹者華言姓蕭也徒單習顯一名克寧徒單者  
華言姓杜也烏林答阿里刺一作阿里合烏林答者  
華言姓蔡也尼龐古外留尼龐古者華言姓魚也一  
作尼忙古蒲察蒲魯渾蒲察者華言姓李也蒲魯渾  
者華言布囊也一作蒲盧渾伯德特里補一作特商  
補朮虎高琪一作高乞朮虎者華言姓董也

元人有七字名者如仁宗名愛育黎拔力八達是也有  
八字名者如汪古氏阿刺兀思剔吉忽里是也有七

字姓者如字思忽兒弘吉刺氏是也有八字姓者如玉耳別里伯牙吾牙氏是也

元成宗名鐵木耳一作鐵穆爾泰定帝名也孫帖木兒帖一作鐵文帝名圖帖睦爾順帝名妥懽帖睦爾帖一作木霸都魯一作霸突魯昔里鈐部一作昔里甘卜也蒲甘卜一作也蒲鈐部

元人稱官爲火者稱貴族爲賽典有以火者爲名如扎八兒火者是也有以賽典爲名如賽典赤瞻思丁是也

元人姓重呼者有脫脫台里氏有脫脫武氏有按攤脫脫里氏有達達兒氏有荅荅里帶氏有徹徹擔思古氏有西域回回氏

元人名重呼者有怯怯里有脫脫木兒有徹徹禿有呵納失失里有土土哈有塔塔統阿有禡禡有牙牙有嚩嚩有朶朶有保保有老老有雪雪有安安有達達有閭閭有買買有濶濶有濶濶不花有濶濶出有濶濶台其名狗狗者二人一石抹氏一郭氏石抹者華言姓蕭也名脫脫者三人一康里氏一蔑兒吉解氏



馬扎兒台之子一乃蠻台氏木華黎五世孫。國初有金華傅鷓鷯本華人也亦踵元人之稱

遼金元同姓名者多

遼史蕭撻不也二人一字特免一字幹里。蕭韓家奴二人一字括寧奚長渤海魯思之後一字休堅涅刺部人中書令按搏之孫

金史完顏訛出二人一更名承德一更名寓訛出者華言寬容也。完顏闍母二人一世祖子諡莊襄一斜婆之孫封道國公闍母者華言金也。完顏謀良虎

二人一康宗子更名宗雄一宣宗子更名玠謀良虎者華言無賴不美之稱也。完顏神土懣二人一太師宗幹之子一光祿大夫胡速魯之子。完顏昂二人一本名吾睹補一本名奔睹。完顏阿魯補二人一更名宗敏一更名光英。完顏宗賢二人一本名阿里一本名賽里阿里者華言喜圍獵也賽里者華言安樂也。完顏齊二人一本名掃合一本名受速。完顏杲二人一本名斜也一本名撒窩喝。完顏胡刺二人一更名守能一更名文胡刺者華言竈突

也。完顏撻懶二人一更名毅英一更名昌。完顏  
劾者二人一德帝之裔胡卒之子一景祖長子封韓  
國公。完顏撒改二人一韓國公劾者之子一金源  
郡王神土懣之子。完顏訛可二人同時皆護衛出  
身一曰草火訛可每得賊好以草火燒之一曰板子  
訛可嘗誤以官中牙牌報班齊者為板子故時人各  
以是稱之。完顏阿魯三人一更名宗賢一更名宗  
強一更名宗本。完顏婁室五人一字幹里衍在太  
宗朝為名將贈侍中追封莘王二世宗子更名承成

封豫王其三皆在哀宗朝時人以長幼別之大婁室  
為鷹揚都尉中婁室小婁室並為元帥。烏古論六  
斤二人一更名禮一更名德升。移刺道二人一本  
名趙一本名按移刺者華言姓劉也

元史帖木兒不花二人一唐兀烏密氏一西域板勒紇  
城人。伯顏二人一畏吾兒氏一蔑兒吉錫氏。泰  
不華二人一伯牙吾台氏一弘吉刺氏。拜住二人  
一安童之孫一蕭氏。塔出二人一蒙古札刺兒氏  
札刺台之子一布兀刺之子

夷號姓名音讀不同。冒頓讀墨特或讀墨咄頭曼讀  
 飲瞞月氏讀月支閼氏讀焉支焉耆讀煙支休屠讀  
 朽諸或讀朽除屠耆讀除祈或讀諸祈屠各讀除各  
 渾邪讀魂命車師讀姑師谷蠡讀鹿離昧蔡讀沫捺  
 龜茲讀邱茲或讀鳩慈且蘭讀沮蘭且鞮讀沮提余  
 吾讀斜吾或讀徐吾允吾讀鉛牙可汗讀榼寒可達  
 讀榼單鞮汗讀提寒蘭汗讀蘭寒呼衍讀呼延鐵弗  
 讀鐵伐浩疊讀合門或讀閻門或讀誥門鈞町讀劬  
 琿莫鞮讀郁軒歲貉讀歲貉先零讀先憐滇零讀滇

憐令狐讀零狐堅昆讀結骨拘彌讀烏彌拘一作朽  
 一作拘並讀烏敕勒讀鐵勒朱提讀殊朮或讀主池  
 悅般讀悅鉢契丹讀乞丹契苾讀喫弊契骨讀喫汨  
 僕固讀僕骨都播讀都波烏丸讀烏桓俟斤讀奇斤  
 方俟讀木其渴俟讀褐其烏朱讀烏爻嗽遠讀悒怛  
 沙吒讀娑咤烏茶讀了撻煎刺讀側粹移刺讀醫粹  
 賀若讀賀惹若干讀惹干若久讀惹久吐難讀突難  
 拔列讀跋栗折屈讀掇掘或讀題屈。温偶餘讀温  
 偶塗呼韓邪讀火韓耶嗑契汗讀托契寒沙漠汗讀

沙漠寒什翼捷讀沙亦虔可足渾讀榼足魂可朱渾  
讀榼殊魂吐谷渾讀突谷魂拔野古讀拔曳固拔汗  
那讀跋寒那吐火羅讀矣呼羅朱俱波讀殊除槃或  
讀朱駒半俟利苾讀其利迭破六漢讀破六韓紇吃  
斯讀黠戛斯郁久間讀木骨間

汲冢周書王會篇所紀四夷國名以肅慎爲稷直獺人  
爲獺人姑蔑爲姊妹東甌爲且甌渠搜爲渠叟其字  
不同豈因當時稱謂異邪按容齋續筆云郡邑之名  
有與本字大不同者顏師古以爲土俗各有別稱是

也如漢書地理志馮翊之櫟陽爲藥陽蓮勺爲輦酌  
太原之慮虜爲廬夷上黨之沾爲添河內之隆慮爲  
林廬蕩陰爲湯陰潁川之不羹爲不郎南陽之鄧爲  
擲堵陽爲者陽沛之鄼爲嗟清河之郇爲輸汝南之  
平輿爲平預濟陰之宛句爲宛劬江夏之沙羨爲沙  
夷九江之橐臯爲拓姑廬江之雩婁爲吁閭山陽之  
方與爲房豫琅邪之不其爲不基東海之承爲證長  
沙之承陽爲烝陽臨淮之取慮爲秋廬張掖之番禾  
爲盤和遼西之且盧爲起廬令支爲鈴祗遼東之番

汗為盤寒樂浪之黏蟬為黏提南海之番禺為潘隅  
蒼梧之荔浦為肄浦豫章之餘汗為餘干梓潼之汁  
方為什方淮陽之陽夏為陽賈魯國之蕃為皮皆不  
可求之於義訓也

夷有單姓三言名者如晉書有段疾陸眷有段務勿塵  
唐書有高阿那肱有李詩瑱高有白真陀羅宋史有  
楊璉真伽此六人段高李白楊五姓皆以三言為名  
漢書金日磾晉書段匹磾魏書于栗磾皆夷種磾音低  
染緇黑石也磾或作碑亦讀低後漢馬日磾華人也

嘉平中與蔡邕等續東觀漢記

史記漢書並云黃帝犬名槃瓠為蠻人之祖槃一作盤  
又魏畧述盤瓠之所以得名由老婦耳病取物變犬  
其說甚怪羅泌云槃瓠者獬豸之轉語耳按五音編  
海獬薄官切注云獬狐犬也又姓系黃帝曾孫卞明  
生子名白犬為蠻人之祖是白犬乃黃帝元孫之名  
非真犬也卞一作弄山海經又云弄明生白犬為犬  
戎之祖

晉書赫連勃勃以鐵伐為氏曰使我子孫剛銳如鐵堪

伐人也又按契丹國號遼實以鑛鐵爲號女真國號金亦取堅剛之義。北魏拓拔氏號曰元蒙古國亦號元取義不同而名自符合

宇文周時有龜茲國人來傳其西域七音之學於中國有曰娑陀力有曰雞識有曰沙識有曰沙侯加濫有曰沙臘有曰般膽有曰俟利筵其別有七於字爲喉牙舌齒唇半齒半唇之七音所謂耳學天竺語多出於音中國或未知也元世祖時巴思八得佛氏遺教制蒙古字亦分七音以聲爲主不論六書之義惟以口傳而耳聽故史書所載夷人姓名事物之稱惟取音耳不可以字義解也

名疑卷四 終

附錄周亮工書影

楊升庵朱鬱儀兩先生著書最多予既合刻其目矣此  
 外陳心叔先生士元楚之應城人所著詩文名歸雲集  
 如千卷外有論語類考廿卷孟子雜記四卷易象鉤解  
 四卷易象彙解廿卷五經異文十一卷姓滙四卷姓鱗  
 四卷名疑四卷古俗字略七卷夢占逸旨八卷隄疾恒  
 談十五卷楚故畧廿卷象教皮編六卷楚絕書二卷荒  
 史六卷世歷四卷江漢叢談二卷俚言解二卷裔語音  
 義四卷嶽記六卷板帙浩繁未易流傳予舊藏六七種

今只存一二矣後託家吳昉大令覓其全本亦不可得相傳先生覽揆之前一夕其父夢一老翁冠袍款戶而入自稱齊卿孟某翼旦而心叔生其父遂小字之曰孟卿後登嘉靖甲辰進士刺灤州己酉二月上丁有事孔廟分獻於孟子木主無故自仆型爵皆墮地心叔惡之遂自免歸稱養吾子息影讀書故著述甚富孝感夏振叔云心叔子堦字吉藪亦博學著有編日新書十二卷

明應城涼心叔先生博極羣書著述凡數十種其名疑四卷仿梁元帝同姓名錄陸龜蒙小名錄之意而推廣之凡古人更名更字及姓名之重複奇僻者靡不登載援据奧博足廣見聞外間傳本絕少余亡友胡君密廬得一善本卷帙已淆亂破損詳加整輯乃成完書往日曾出以示余余謂此書搜採固富紕繆閒亦不免如郤克郤錡之同稱駒伯與字無干印段是公孫段從兄之子不當云從父之子張老張趨俱稱張孟係祖孫非父子此等



處未免稍有沿訛密廬謂作書義各有取陳君意在徵引浩博以資閱覽與譜春秋氏族表唐宰相世系者不同未足爲此書病也歲戊辰虞山家若雲先生方甄綜祕笈廣刊叢書余因于密廬之令嗣兩岑處假得之剞劂旣竟並與校讐其顯然謬誤者正之無關義要者則姑仍之勘讀一過附識末簡迴憶曩時執友之論不勝宿草之感云嘉慶己巳四月鎮洋張鐸跋

名疑卷四終

嘉慶己巳夏四月  
昭文張海鵬校梓

